



15
1301
9



門 5
號 1301
卷 9

唐文拾遺卷之二十四

榮祿大夫三品頂戴前分巡廣東高廉道加四級臣陸心源輯

崔儒

儒德宗朝人

嚴先生釣臺記

易象以天地交乃泰夫交者氣同道濟之謂也同則無變濟則兼利雖君臣之殊位品類之異數其義一焉嚴子陵與漢世祖可為天地之交矣嚴君處道玄寂超往返獨以輔弼為縲紲以寵榮為穢污絕世高蹈歸乎舊山斯達人之常域也世祖不以祿位抑之

昭和十年
二月十四日
購求

不以褒崇加之其來也同寢共體其去也鴻飛雲逝
示君臣之與際存天地之易簡道泰氣同交之至也
後之人以常情所不及異而疏之飾而詞之是彫之
至樸逕於夷途矣況今之交者權利傾弛百無一全
知人知己事皆味絕邈想遺塵慨然興悲觀其兩峯
相嶽羣木茂植上有平田足以力耕下臨清流可以
垂釣乃嘉遁之勝境舍此何居則呂尚父不應餌魚
任公子未必釣鼈世人名之耳釣臺之名亦猶是乎
行舟輟颿因有斯述將以誠夫偽交與貪位者豈直
紀事而已哉興元元年夏四月景辰建嚴陵

集

宋再興

再興建中時人田悅叛偽封長豐縣丞

故雲麾將軍守左金吾衛大將軍試鴻臚卿上

柱國宋公墓誌銘 并序

府君宋公諱儼西河郡人也宿著天雅英雄越風當
才用武文烈古今料敵先鋒決勝千里衝突兵象煞
氣橫屍建中三年七月出薊城奉恩命元戎宋公我
神將府君宋公親領甲兵收掌恆定圍深州剋伏其
年十一月破恆定節度張惟岳十萬餘人積屍遍野
收聚屍骸埋築丘塚何期國家負德不與功勳反禍

燕師授太原河東節度口口惡奏先領朔方兵甲隴
右道李懷光領秦兵及殿前兵馬同廿餘萬屯營魏
博御河西側我幽州節度并以恆冀兵馬建中三年
三月離深州至魏貝相去秦兵十里屯營再鼓烈陣
弓矢相交六月卅日破馬遂兵馬廿餘萬積屍遍野
血流御河我府君名將節操衝口交鋒決命於先不
顧殘軀名播後世何期運命緣終逝水長流永絕卒
於此日陣也享年春秋卅有八嗚呼痛哉喪矣哲仁
愁雲位垂悲風慘色爲此忠効冀國王封子長豐縣
丞報其名父夫人公孫氏孀居叵歲撫有家業禮有

曹家之誠孝絕孟母之葬齊眉雙明琴瑟同韻何期
先喪於前卜嗟良日建中四年歲次癸亥四月丁未
朔廿七日癸酉葬於幽昌平縣東北十里武安鄉墳
開數仞後擁月口堆阜千重橫瞻玉按右帶房山之
秀左臨滄海之涯宜其備矣鐫石千古萬世銘曰
名將賢良貞幹負霜榮枯萬世惟德洋洋

石刻

張周

周建中朝官給事郎行河南府洛陽縣丞翰林學士
賜緋

大唐涇王故妣韋氏墓誌銘序

夫必有婦其尚矣先務德次求容功兼而有之方謂
盡善不爾則不足以侍執中櫛宜其室家故詩稱好
逌傳著嘉偶非必獲是孰媿名王妃姓韋氏蓋京兆
長安人祖湜皇朝中散大夫賴王府司馬贈光祿卿
父昭訓皇朝中散大夫太子僕贈衛尉卿皆公望自
遠吏才兼優來以何暮見歌去以不留興詠妃卽淮
陽府君之第四女也自漢及今門爲望族男不卿士
女則嬪嬙蟬冕魚軒與時間出騰光簡諫昭晰紛綸
妃蕙以爲心馨甘如蔗詞懿而定服純而衷位則干
乘小君行則一人猶母雖貴無壽命也如何嗚呼享

年四十八以建中二年十二月己酉薨於寢以三年
二月庚申葬於原禮也存不育男孕女沒無主祀執
喪有足悲夫銘曰

關右著姓海內名家氣與蘭馥顏如舜華宜乎作嬪
于王之室如何不淑中路先畢松楸交植塗芻共來
一晝朝露千秋夜臺目覩原野心傷埋沒日旣光沉
人亦薰歇中無可欲焉慮發掘但悵長辭獨歸城闕

石

高郢

全唐文四百四十九有傳

勒停鼓吹四嚴奏

六典凡駕行幸有夜警晨嚴之制今署司所申是并警亦呼為嚴相承已久樂官不能辨伏奉開元禮皇帝時饗太廟及上辛祈穀于圜邱皆于正殿致齋第三日欲赴行宮前七刻五刻二刻有三嚴之儀並無五更三點以前四嚴及駕至橋一嚴之文伏請勒停准禮依時刻三嚴又其時所設宮懸懸而不作鑾駕進發不鳴鼓吹至祀日太廟饗禮畢鑾駕欲發及南郊行事鑾駕還宮之時然後各有三嚴皇帝既還大次停一刻須槌一鼓為一嚴三刻須槌二鼓為再嚴

五刻須槌三鼓為三嚴往例儀注皆准此禮鼓吹署所申並與禮文不同又都未知准禮是行事畢有三嚴之制伏以立禮之旨務於精誠鑾駕出宮在祀前之日猶懸而不作不鳴鼓吹况祠所齋潔明發行事此夜誠合清淨不應鉦鼓誼譁其鼓吹署所申四嚴及臨上壇一嚴伏請勒停其行事畢後南郊迴請准禮依時刻三嚴太廟宿其後不嚴及南郊迴於明德門裏鼓引駕至丹鳳門

唐會要卷十八

邵說

全唐文四百五十二有傳

唐故開府儀同三司兼左羽林軍大將軍知軍
事文安郡王贈工部尚書清河張公神道碑

銘并序

大曆乙卯歲夏四月有星犯於北落洎秋九月癸巳
大將軍維岳薨于位冕旒悼惜贈工部尚書申命有
司備禮以其年十月乙酉葬於高陵縣奉政之先塋
公髫髻敏異弱冠宏達風儀朗徹望之嶷然業于武
專于學精于戰陳口于兵鈴萬人之敵也天寶末改
服仗劍北趨朔邊屬幽陵首禍安羯稱亂汾陽王郭
公子儀偉其才畧引爲步將清渠之戰特拜左衛將

軍黨口背德恣爲陵逼肅宗命公以麾下敢死亟往
摧之遷右衛大將軍乾元中汾陽蕩定咸洛追鉏元
惡公奮無前口勇拔棘而馳自衛程鄴煞傷滿野加
通義大夫太僕卿封南陽縣男思明繼逆再擾東夏
太尉李光弼扼河陽之險制覃懷之寇公凌堞口口
口擒魁渠矢貫其背血流被臆聖私表異遷銀青光
祿大夫試鴻臚卿李國貞繼掌師律身戕衆潰虜旅
散掠居人駭亡公口口寇盜完安郡邑僕固懷恩之
授鉞也亦仗公以心腹公閱視才力教之引滿藝成
微札者凡二千人署曰平射營爲師之口口先後今

聖踐極改試殿中監進封開國伯自是走朝義踰九
河梟凶猷逆日聞凱獲授特進試太常卿進封南陽
郡公食以實封累加開府懷恩之道封漢東郡王增
封一百五十戶充朔方都知兵馬使公以三軍無帥
審于避嫌駟歸闕下口食四百五十戶拜左羽林軍
將軍知軍事公固辭爵邑之大食二百五十戶前此
軍政壞蠹習以生常有無其人而私入其食與其衣
者有市井屠沽之伍避屬所征役而冒趨戎行者公
悉罷斥歸之尹京解紫紱而從褐衣者凡千二百輩
其餘慰撫字恤討而訓之皆趨才勇悍一以當百丁

憂去職柴毀過禮而官曹之事復曠紊無章大君深
惟其人莫克纘奉起公于苴經之內俾復舊官改封
文安郡王泣乞終喪抑而不納于是圖贍軍實買遷
有無製良弓勁矢强弩堅甲動萬萬計其長戟利劍
戈矛及鋌亦萬萬計至于經費餘羨緡錢緡縞米鹽
稻麥之數莫之能紀咸登于內府實于禁倉其有牛
車什器入于中者亦數十百萬上所獎重遷奉軍大
將軍公以天時地利明主之所當知也創風口氣候
圖密以上獻復慮國用不足奉私財佐軍帝益加歎
因而賜弔公始自將校驟隨節制幕下之碩畫公必

卷二十四
一
佐焉軍中之右職公必更焉迨口禁旅游濡渥澤一人
之顧問公實參焉九重之謀議公皆造焉錫以金券
仍畫像于凌烟閣謂享鮪者爲邦翰垣不及中身何
剝喪之速寢瘵之日御醫結轍傾落之後中貴盈門
賄穢之數加常一等或吊唁其室或奠祭于塗其恩
口之厚也如此公外強毅而內滄至其奉親也竭力
于養盡心于疾養則問其所欲視其所膳晨昏莫之
違也疾則頓其色致其憂冠帶莫之解也雖迫以嚴
命竟從於金革而飲恨終身永痛於創鉅加以義禮
接於姻戚任卹深於子姪婁貧飽其惠孤藐忘其亡

蓋孝悌之極也本乎世系則隨齊州刺史政之曾孫
皇太子家令元濟之孫豐王府司馬贈靈州大都督
履仁之子世尚忠肅以術學理行聞蓋靈源之滄也
議其祚胤則益王府長史曼左監門衛率府錄事參
軍杲太子司議郎晟崇文生曩長未及冠弱纔知方
然而因心克孝率禮不越蓋積慶之深也公視其母
弟有志切于己焉家之餘財身之後事盡委于志既
而喪紀辦護豐碑篆刻皆令季之所爲也人謂文安
友愛有志弟悌張氏之業其不替乎銘曰
勤臣之賢將有文安累康屯艱爲邦垣藩焚焚巨滑

射天吠主帝念汾陽專征耀武惟公憤發願從旗鼓
肇自朔裔南馳關輔關輔既清復東其旅訓激貔虎
戎摧狡虜思明繼逆再擾三河河陽之師實制殲牙
桓桓太尉將定諸華忿是覃懷附于兇邪公擒其帥
勳伐居多懷恩授鉞討除姦羯翳公烈烈遂掃逋孽
汾上之潰我成其功違難遠嫌宛口清風訓馭北落
聲華有融如何昊穹而降斯凶贈以冬官洪惟飾終
轉發京邑冊歸渭汭精魄何之英名孰繼空留片石
萬有千歲

石刻

韋皋

全唐文四百五十三有傳

破吐蕃奏

雲南蠻王異牟尋領部落兵馬破吐蕃并收鐵橋以
來城壘一十六擒吐蕃王五人歸降百姓一十二萬
人約計三萬餘戶大小城一十六所

唐會要
九十九

請賜南詔金印奏

南詔前遣清平官尹仇寬獻所授吐蕃印五二用黃
金今賜印請以黃金從蠻夷所重

同上

韋執誼

全唐文四百五十五有傳

請令修撰官各撰日歷奏

伏以皇王大典實存簡冊施于千載傳述不輕竊見自頃已來史臣所有修撰皆于私家紀錄其本不在館中褒貶之間恐傷獨見編紀之際或慮遺文從前已來有此乖闕自今已後伏望令修撰官各撰日歷凡至月終卽於館中都會詳定是非使置姓名同其封鑱除已成實錄撰進宣下者其餘見修日歷並不得私家置本仍請永爲常式

唐會要六十三

李若初

若初貞元時官鹽鐵使

請勿禁見錢出界奏

諸道州府多以近日泉貨數少繒帛價輕禁止見錢不令出界致使課利有缺商賈不通請指揮見錢任其往來勿使禁止

唐會要八十九

關播

全唐文四百五十五有傳

三省庫官更置一人奏

三省中庫官各一人或屬假故卽公事廢闕請各更置一人其吏部行內考功司封司勳卽庫中仍請兩人分掌臨時事故卽勒通知奏

唐會要八十二

王礎

礎貞元中黔中經畧招討觀察使

大曆七年進士歷秘書少監中丞

請准東謝蠻朝貢奏

西南蕃大酋長正議大夫檢校蠻州長史繼襲蠻州刺史貴陽郡開國公賜紫金魚袋宋鼎左右大首領朝散大夫前檢校邛州刺史賜紫金魚袋謝汕左右大首領繼襲攝蠻州巴江縣令借紫金魚袋宋萬傳界首子弟大首領朝散大夫牂州錄事參軍謝文經前件刺史建中三年一度朝賀自後更不許隨例入朝今年懇訴稱州接牂州同被聲教獨此排擯竊自

慚恥謹遣隨牂州等朝賀伏乞特賜優諭兼同牂州刺史授官其牂州兩州戶口殷盛人力强大鄰側諸蕃悉皆敬憚請比兩州每年一度朝賀仍依牂州輪環差定并以才幹位望為眾所推者充

唐會要九十八

按自前件刺史下與全文九百九十九所收東謝

蠻宋鼎奏同

沈既濟

全唐文四百七十六有傳

枕中記

開元七年道士有呂翁者得神仙術行邯鄲道中息

耶舍攝帽弛帶隱囊而坐俄見旅一作邑中少年乃盧
生也衣短褐乘青駒將適于田亦止於邸中與翁共
席而坐言笑殊暢久之盧生顧其衣裝敝褻乃長歎
息曰大丈夫生世不諧困如是也翁曰觀子形體無
苦無恙談諧方適而歎其困者何也生曰吾此苟生
耳何適之謂翁曰此不謂適而何謂適答曰士之生
世當建功樹名出將入相列鼎而食選聲而聽使族
益昌而家益肥然後可與言適乎吾嘗思于學富于
遊藝自惟當年青紫可拾今已適壯猶勤畎畝非困
而何言訖而目昏思寐時主人方蒸黍翁乃探囊中

枕以授之曰子枕吾枕當令子榮適如志其枕青蠶
而竅其兩端生俛首就之見其竅漸大明朗乃舉身
而入遂至其家數月娶清河崔氏女女容甚麗生資
愈厚生大悅由是衣裝服馭日益鮮盛明年舉進士
登第釋褐祕校應制轉渭南尉俄遷監察御史轉起
居舍人知制誥三載出典同州遷陝牧一作郡生性好
土功自陝西鑿河八十里以濟不通邦人利之刻石
紀德移節沐州領河南道採訪使徵爲京兆尹是歲
神武皇帝方事戎狄恢宏土宇會吐蕃悉抹一作採邏
及燭龍莽布支攻陷瓜沙而節度使王君冕新被殺

河湟震動帝思將帥之才遂除生御史中丞河西道
 節度大破戎虜斬首七千級一作十餘萬開地九百里築
 三□城以遮要害邊人立石於居一作扶延山以頌之
 歸朝冊勲恩禮極盛轉吏部侍郎遷戶部尚書兼御
 史大夫時望清重群情翕習大為時宰所忌以飛語
 中之貶為端州刺史三年徵為常侍未幾同中書門
 下平章事與蕭中令嵩裴侍中光庭同執大政十餘
 年嘉謨密命一日三接獻替啟沃號為賢相同列害
 之復誣與邊將交結所圖不軌下制獄府吏引從至
 其門而急收之生惶駭不測謂妻子曰吾家山東有

良田五頃足以禦寒餒何苦求祿而今及此思衣短
 褐乘青駒行邯鄲道中不可得也引刃自刎其妻救
 之獲免其一作共罹者皆死獨生為中官保之減罪死
一作死罪投驩州數年帝知寃復追為中書令封燕國公
 恩旨殊異生五子曰儉曰傳曰位曰倜曰倚皆有才
 器儉進士登第為考功員外傳為侍御史位為太常
 丞倜為萬年尉倚最賢年二十八為左襄其姻媾皆
 天下望族有孫十餘人兩竄荒徼再登台鉉出入中
 外徧翔臺閣五十餘年崇盛赫奕性頗奢蕩甚好佚
 樂後庭聲色皆第一綺麗前後賜良田甲第佳人名

馬不可勝數後年漸衰邁屢乞骸骨不許病中人候
問相踵於道名醫上藥無不至焉將歿上疏曰臣本
山東諸生以田圃爲娛偶逢聖運得列官敘過蒙殊
獎特秩鴻私出擁節旌入昇台輔周旋中外綿歷歲
時有忝天恩無裨聖化負乘貽寇履薄增憂日懼一
日不知老至今年逾八十位極三事鐘漏竝歇筋骸
俱耄彌留沉頓待時益盡顧無成效上答休明空負
深恩永辭聖代無任感戀之至謹奉表陳謝詔曰卿
以俊德作朕元輔出擁藩翰入贊雍熙昇平二紀實
卿所賴比嬰疾疹日謂痊平豈斯沉痾良用憫惻今

令驃騎大將軍高力士就第候省其勉加鍼石爲予
自愛猶冀無妄期於有瘳是夕薨盧生欠伸而悟見
其身方偃於邸舍呂翁坐其傍主人蒸黍未熟觸類
如故生蹶然而興曰豈其夢寐也翁謂生曰人生之
適亦如是矣生慙然良久謝曰夫寵辱之道窮達之
運得喪之理死生之情盡知之矣此先生所以窒吾
欲也敢不受教稽首再拜而去

吳興藝
文補

李堅立

堅立貞元中爲司農少卿

太倉石柱記

貞元五年四海文明天子唯穀是恤思富國便民之事莫若端本以尊農事故廩庾困倉尤切聖慮俾少卿一人專領其署蓋欲難其任而重其事也

唐會要六十六

崔縱

全唐文四百七十八有傳

復祀靈星等壇奏

立春後丑日祀風師立夏後申日祀雨師立秋後辰日祀靈星立冬後亥日祀司中司命司民司祿惟上元元年制中祀小祀一切權停至永泰二年有勅復風師雨師其靈星司中司命等壇宜令所司准開元

禮配享

唐會要二十三

杜黃裳

全唐文四百七十八有傳

前資官充專知奏

以前資官充專知既無俸料頗亦艱辛請入庫日便依資與官仍許四周年不用闕

唐會要八十二

中宗神主遷西夾室奏

順宗皇帝神主已升祔太廟告祧之後即合遞遷中宗皇帝神主今在三昭三穆之外准禮合遷于太廟後西第一夾室每至禘祫之日合食如常

唐會要卷十五

裴堪

全唐文四百七十九有傳

請勿以太學生代齋郎奏

嚴奉宗廟時享月祭帝王展孝之重典也故致齋清宮設齋郎執事使夫習肄虔恪肅恭神人內盡其敬也太學置生徒服勤儒業宏闡教化發明德義用嚴師以訓之懸美祿以待之限其課第考其否臧外獎其學也夫如是齋郎官員焉可廢也太學生徒焉可亂也若慮不素潔則無以觀其敬矣志不宿著則無以成其業矣故提其名而目之表其從事也積其勤

而祿之使其服志也罷齋郎則失重祭之義用學生則撓敬業之道將何以見促數之節肅敬之容強立之成待問之與知必不能至矣况國家有典崇儒有制豈以齋郎瀆易是病而思去之學生冗惰無取而思役之誠宜名分有殊課第自別使俎豆有楚弓冶知訓供職有賞勤之利敦學得樂羣之至禮舉舊典人知向方庶乎簡牘無罷代之煩監寺絕往來之弊矣將敦要本在別司存俾不相參庶合事體

唐會要五十九

諫張茂宗借吉就婚奏

按此文見唐會要三十八題作裴堪名今存

其目文見全唐文五百十五卷

高參

全唐文四百八十有傳

賜爵以五品為限奏

准貞元二年十月勅准制三品已上賜爵一級並以三品階為限者其有以五品受賜者並未標格限所司檢勘不備其貞元元年十二月制五品已上賜爵一級亦請以五品為限仍望為常式

唐會要八十一

權德輿

全唐文四百八十三有傳

請續修律令事類奏

自開元二十五年修格式律令事類三十卷處分長行勅等自大曆十四年六月元和二年正月兩度制刪之並施行伏以諸司所奏苟便一時事非經久或舊章既具徒更煩文獄理重輕繫人性命其元和二年准制刪定至元和五年刪定畢所奏三十卷歲月最近伏望具送臣本司其元和五年已後續有勅文合長行者望令諸司錄送刑部臣請與本司侍郎郎官參詳錯綜同編入本續具聞奏庶人知守法吏絕

舞文

唐會要三十九

李文則

文則建中朝人

大唐故宣州宣城縣尉李府君夫人賈氏墓誌

銘并序

夫人諱嬪字淑容長樂人也其先晉唐叔之後因別封而族焉遠祖誼以文傳長沙桓王漢帝膝之前席洎王莽末稟祖復以創命功遂圖雲閣旌美之則本仁義淬文質守忠信者良亦多矣祖王父藝易州遂城縣令王父玄操洺州洺水縣令烈考彥璿朝請大夫閩州刺史皆種德前列温温其恭澤流子孫世濟

於美夫人妙閑閨壺明練威儀婉婉潛會於徽容工巧寔資於柔德有行之歲儀鳳于飛聞既見之詩而誓心永畢公隴西人也舉賢良授宣城尉其餘官婚列於別傳故不書遂能宮徵調和塤箎韻叶奉蘋藻而修盟饋朝舅姑而事組紉雍雍喈喈聞唱必和豈圖旻天不吊殲我良人夫人感恭姜之遂孤痛顏子之不幸至哀而哭不在夜居邑而動必合禮遂貞其節潔其名守其婺矣以從父之弟住於茲邑因臻焉又能恤孤弱以慈睦天倫以孝優遊自得喜怒不形誰謂六極俄鍾遐齡不享以建中二年二月十二日

寢疾奄終於趙州元氏縣之官舍淡族銜哀舉門抱
痛春秋七十有六無子有張氏女一人泣血毀容殆
將滅性以其年三月廿三日窆於七義原權禮也合
防之志今則未從同穴之言他年奚復從子文則哀
迫懇到寄詞于石銘曰
於昭祖宗誕膺明哲爰洎夫人克勤禮節人欽嘉行
族滿休聲心存大順志潔孤貞嘉行伊何合於內則
休聲伊何軌儀不慝物終歇滅道有湮淪哀哀孝女
盡我生人一扇泉壤萬歲千春石刻
李齊運

齊運蔣王憚孫始補甯王府東閣祭酒擢累監察御
史長安令京兆少尹出爲河中尹李晟壁渭橋齊運
時拜京兆尹督芻粟餉晟賊平頗有助改宗正卿進
至禮部尙書

請收利以助公厨奏

當司本錢至少厨食闕絕請準秘書省大理寺例取
戶部闕職官錢二千貫文充本收利以助公厨

唐會要九

皇甫政

政貞元中越州刺史

請補進綾縠奏

貞元十年進綾縠一千七百匹至汴州值兵逆叛物皆散失請新來客戶續補前數唐會要八十五

鄭叔則

叔則貞元中太常卿

皇太子觀謁暫服墨縗議

准禮子為母齊衰杖周更無貴賤降殺之別伏以聖上以大中立教以至孝興理憲章古道肅慎禮文皇太子稟訓睿哲因心孝敬緣情酌禮復古為宜准禮既葬卒哭十一月小祥十三月大祥十五日禫至于

昏定晨省問安視膳不可服衰麻密近宸展伏請每

詣正內觀謁暫服墨縗歸至本院依舊縗麻庶適變

通允叶情禮唐會要三十八

蕭據

據貞元中河中府倉曹參軍

請詳定婦為舅姑服狀

堂兄姪女子適李氏婿見居喪今時俗婦為舅姑服

三年懇為非禮請禮院詳定唐會要三十八

令狐建

建滑毫魏博節度使彰子累官左神武軍右領軍衛

大將軍坐專殺貶施州別駕卒贈揚州大都督
議改武成王廟祝版署名奏

當今兵革未偃宜存武教以尊古重忠烈以勸今欲
有貶損恐非激勸之道也頃者追尊也致禮者文戲
亂者武遂追尊王位以時祠之爲武教之主若不尊
其禮則無以重其教也故文武二教猶五行之迭用
四時之代序固宜並立廢一不可况其典禮之制已
歷三聖今欲改之恐非宜也

唐郊祀錄卷十

李業

業貞元時河東節度使兼太原尹



草馬不許出界奏

當管諸軍州草馬准貞元三年十二月十三日勅文
不許出界又准去年五月十五日司門轉牒諸道應
有草馬准勅並不命出界今緣近日諸道差人於當
管市馬不依勅文并收草馬伏乞天恩詔下諸道准
元勅約勒

唐會要七十二

李兼

兼德宗時江西都團練

破賊神應請付史官奏

建中四年臣任鄂州刺史逆賊李希烈之將童待召

率眾襲鄂州順風縱火邑屋將焚臣乃禱於城隍神
倏忽風迴火烈賊潰遂擊破之連拔黃沔二州請付
史官以答神意 册府

楊瑱

瑱貞元時御史中丞

現任官不得離任奏

現任官或被諸司不奏便移文牒充判官伏請自今
已後應現任州縣正官不承制敕差補不得輒離任
唐會要
七十八

劉震

震貞元中試左驍衛兵曹參軍

唐故朗州武陵縣主簿桑公墓誌銘 并序

公諱粵字粵受姓名氏編于史册曾祖克誠皇朝左
羽林軍長史祖環皇朝江夏郡司馬父倩皇朝試廬
州長史公闕閱勲華世爲顯族博究書傳達不因人
肅政推能歷有梅香之任清規迥秀服稱時輩虛心
應物士歸雅望天寶五載奄從大夜夫人太原王氏
東都閑廐使知古第三女也聰惠柔順賢和早彰笄
歲移天主公中饋既諧琴瑟鸞鳳和鳴居公之邑弃
膏捐粉敬依佛道齋戒爲心訓子孀儀親姻仰則天

寶末賊將祿山掩有河洛乾元之中思明繼禍中原
鼎沸塗炭生靈十室九空人煙斷絕少有疾疹遂至
膏肓辛丑年中十一月而卒攢窆洛城南纏私第從
時宜也日諸月諸卅餘祀愛子日初朝散大夫試鴻
臚卿累朝忠臣佐輔戎幕盪滌邊羯拂鋤群醜功逾
衛霍計拔良平久俟通年獲此龜吉以貞元五年八
月廿一日歸祔河南縣平樂鄉先君禮也頃家盡產
卜宅從儀恐陵谷難常刊石將為不朽詞曰
積德餘慶福垂後昆高門是封龍虎風雲先君舊域
孝婦新墳千秋萬古盛嗣存存石刻

李吉甫

全唐文五百十二有傳

修元獻皇后廟奏

準國朝故事昭成皇后肅明皇后元獻皇后並置別
廟若於大行皇帝陵所祠殿奉安神主禮經典故檢
討無文伏以元獻皇后廟在太社之西今請修葺以
為大行皇后別廟唐會要卷三

舊制經畧不隸靈武奏

國家舊制六胡州在靈鹽界內開元中廢六州置州
以寬宥為名領諸降戶天寶末宥州寄理於經畧軍

蓋以地形居中可以總督蕃部北以應接天德南援
夏州今經畧隸靈武又不置軍鎮非舊制也册府九
百九十

三
韋彤

全唐文五百十五有傳

瑤臺寺側置文皇寢園奏

歷代禮書及國朝故事未見有不可改移之禮先王
建都立邑以安民也有不便則為之遷况其有故乎
伏以文皇寢園頃遇焚蕪遂奉仙駕久移舊宮事則
因災非無故也歲月傳敘神御已安就其修建可謂

至順且陵旁置寢是秦漢之法擇其高爽務取清嚴
去陵遠近本無著定是以今之制置里數不同各于
柏城隨其便地又非皆在山下也臣訪聞昭陵舊寢
經火之後人行遂少林莽隱蔽逕路欹危伏以元宮
尚齒所奏宜靜今若必須仍舊土木興功不惟負載
至難亦恐喧囂太逼大道以變通則久聖人以適時
為禮今陛下孝思所切營建惟新是則通于神明豈
伊常情所及聖旨所示謂于瑤臺寺左側是必于昭
陵柏城之內不在瑤臺寺明矣既不越封兆而力役
易從俯近井泉則膳羞愈潔規模一定垂之無窮酌

其便宜誠爲允當

唐會要二十

楊於陵

全唐文五百二十三有傳

辭全俸表

臣以年力衰退陳乞休閒伏蒙聖恩特賜矜免授尙書左僕射致仕全給俸料臣伏以朝廷致祿本爲職勞衰病乞閑自宜家食而半給之俸近古所行義誠屬於優賢事亦兼於養老以臣慵耄敢當料程伏以思維已爲過幸今若又踰常制重啟殊恩錫端寮之厚俸爲朽質之私費循理撫事情所不安招損害

盈臣所深懼伏乞俯迴聖睭再敕有司得從半祿之

文斯乃殘年之幸

唐會要六十七

刺史見闕量材差擇奏

貞元中觀察使李復奏南方事宜素異地土之卑上佐多是雜流大半刺史見闕請於判官中揀擇材吏令知州事臣伏見近日諸道差判官監領州務朝廷以爲非宜臣謂現今州縣凋殘刺史闕員動經數歲至於上佐悉是貶人若遣知州必致撓敗伏緣李復所奏降敕年月稍遠懼違朝旨伏乞天恩許臣遵守當道所奏各量才差擇以便荒隅

唐會要六十八

Blank page with vertical lines for text.



唐文拾遺卷之二十五

榮祿大夫三品頂戴前分巡廣東高廉道加四級臣陸心源輯
嚴浣

全唐文五百二十六有傳

祀武成王議

謹按李紆所奏援引訓典比量禮度祝文輕重之殺
獻官尊卑之節誠至當矣而推以廣之抑未盡也夫
大名徽號先聖王所以褒前哲令德之人謂其言可
以範圍其行可以師表其功可以施百代其業可以
振千古苟未至也則不可虛美其于太公兵權奇計

之人耳當殷辛失德八百諸侯皆歸于周時惟鷹揚以爲佐命在周信有功矣于殷謂之何哉祀典不云乎法施于人則祀之有功于民則祀之仲尼之祖述堯舜憲章文武刪詩書定禮樂使君君臣臣父子子后王及學者皆宗師之可謂法施于民者如周棄之始播百穀勾龍之序平九土生人衣食者皆受其賜可謂有功于人矣非爲是族其有片善式閔封墓也我有唐以義兵集大勛以武德平禍亂度隋室法堯之禪當夏啟慕禹之績立法垂制酌乎永貞觀中以其兵家之流始令礪溪立廟開元中著上戊釋奠

之禮其于追寵不爲薄矣上元之際執事者苟以兵戎之急遂尊武成封王之號擬議于文宣王優劣萬殊不可以訓禮不云乎擬人必于其倫春秋左氏傳曰唯名與器不可假人孔子曰名不正則言不順太公之于聖人非倫也口至而德尊非名也德薄而名大非順也有一于此是爲神羞况三者皆謬安可微倖之哉太史公以韓非與老子同傳人到于今非之高祖封韓信爲侯自耻與絳灌等列况聖朝褒口之稱其可雷同乎愚以爲宜去武成及王字依舊令爲齊太公廟人無間言矣享獻之事餘依李紆奏

大唐郊祀錄十

參唐會要
二十三

按全文所收與此不同

李巽

全唐文五百二十六有傳

比類累年糶鹽錢數奏

江淮河南河內兗鄆嶺南諸鹽院元和三年糶鹽都
收價錢七百二十七萬八千一百六十貫比量未改
法已前舊鹽利摠約時價四倍加榷計成虛估錢一
千七百八十一萬五千八百七貫貞元二年收糶鹽
虛錢六百五十九萬六千貫永貞元年收糶鹽虛錢

七百五十三萬一百貫元和元年收糶鹽虛錢一千
一百二十八萬貫二年收糶鹽虛錢一千三百五萬
七千三百貫三年收糶鹽虛錢一千七百八十一萬
五千一百貫謹具累年糶鹽比類錢數具所收錢除
准舊例充鹽本外請付度支收管

冊府四百九十三

實參

參字時中刑部尙書誕孫以蔭累爲萬年尉德宗初
爲御史中丞俄拜中書侍郎同平章事宣武劉士寧
餉參絹五千帝大怒以爲外交戎臣貶驩州司馬賜
死

續差御史監祭奏

得監察御史鄭襄狀準六典應郊廟祀祭皆御史監之蓋職在省其器服閱其牲牢有不修敬則舉劾聞奏主者嚴薦獻交神明監者舉過繆糾闕誤所務不同準式齋官有故許通融行事公事數人可得通攝其監祭御史唯有一人舊例有故便闕者伏以祀事肅恭國家大典苟無糾察恐虧慎重却請以後監祭御史誓戒後有假及改轉者許續差御史令沐浴潔服往卽冀官次有常禮物嚴備

唐會要
六十

武元衡

全唐文五百三十一有傳

更請厨料本錢疏

厨料欠少更請本錢一千貫文收利充用置捉錢四人其所置請用直官及寫御書各兩員每員捉錢二百五十貫文爲定額卽免額外置人

唐會要
六十四

三院御史班序奏

准貞元二年班序勅使下三院御史有本官是常參官兼者卽入本官班如內供奉裏行卽入御史班緣使下御史近例並不存內供奉班內請自今以後諸使下御史內供奉者入閣日并依宣政殿前班位次

員外郎之後在正臺監察御史之上使為常式唐會要

三品官除謝奏

中書門下御史臺五品以上官尚書省四品以上官
諸司正三品以上官及從三品職事官東都留守轉
運鹽鐵節度觀察使團練防禦招討經畧等使河南
尹同華州刺史諸衛將軍三品以上官除授皆入閣
謝其餘官許于宣政南班拜訖便退唐會要

裴度

全唐文五百三十七有傳

廢金牛等十六縣為鄉奏

興元府廢金牛縣為鄉三洋州廢洋源縣為鄉五閬
州廢岐平縣為鄉四利州廢景谷縣為鄉五通州廢
三岡縣為鄉四廢石鼓縣為鄉五巴州廢奇章縣為
鄉四廢盤道縣為鄉五蓬州廢郎池縣為鄉六廢良
山縣為鄉六集州廢通平縣為鄉十璧州廢廣納縣
為鄉六渠州廢大竹縣為鄉三廢潏水縣為鄉三鳳
州廢黃花縣為鄉二開州廢萬歲縣為鄉六準今年
二月勅廢金牛等十六縣為鄉令並隨便近割隸屬

諸縣訖唐會要

乞留男讓奏

京兆府參軍裴讓是臣男年甚幼小官無職事今准近勅須令守官伏以臣男之官無慮數人悉是資蔭授官所以置之散冗守官既無功事離任從無妨闕伏乞天恩依前令在臣所任

册府四百四十七

西門元佐

元佐元和中鄉貢進士西門大夫從姪

大唐故朝議郎行宮闈令充威遠軍監軍上柱

國賜紫金魚袋西門大夫墓誌銘

并序

公諱珍京兆雲陽人也曾祖口祖彭並蘊異才不苟

榮祿孝悌雖形於家室聲芳已著於遠邇父進朝議郎行內給事賜緋魚袋立性於寬執心忠亮入侍闈展出撫軍師厯事四朝竟無敗累故中外貴承咸遵厥行公器局宏邁見解殊倫幹於理劇果於從政志存大略不忌小節恒人譏其傲睨高賢許其豁達至德之初釋褐從仕大厯之末擢居宣徽建中四年王室多故涇源叛卒晝入犯門鑿輿西巡以避封豕艱虞之際尤尙通才除內府局丞充鳳翔隴右節度監軍判官時懷光不臣潛與泚合翠華於是更幸梁洋節使楚林果有疑貳公每於衙府輒肆直言諭其將

士微以禍福國家靡汙隴之憂州縣免誅夷之弊微
公之力殆不及此德宗聞而異之俾充荆襄沔鄂洪
府宣慰使興元元年遂除洪府判官隨先鋒兵馬使
伊慎下安黃等州貞元元年來獻俘馘上旌公功拜
內僕令令赴本道其年季秋改充豪壽觀察監軍判
官尋除張建封尚書爲徐泗節度詔公獨監送上職
名如故其年朝覲遷荆南監軍上以公習於戎事欲
將任重聖心未決久而不遣至八年充劍南三川宣
慰使其六月監淄青行營兵馬三千餘人戍于岐山
西扞荒服上以公臨事不私撫軍有術凡積星歲踰

十瓜時十三年入奏上嘉其勲錫以朱紱昆戎自從
會盟歷負恩信知我有備未嘗犯邊上以關東甲士
遠從勞役悉令罷鎮却歸本管三軍別公援轡揮泣
如訣父母豈勝道哉旣歸闕庭復任高品暨德宗昇
遐順宗嗣位爰選耆德以輔儲皇轉爲少陽院五品
承貞元年屬今上龍飛公以密近翼戴之績賜紫金
魚袋充會仙院使元和元年改充十王宅使歷事六
朝公智足以周身謀足以解難事上不逼接下不侮
自束髮委質銜命撫軍宣慈則蒸庶再蘇討叛則兇
渠授戮動有流譽人無謗言若非淑慎曷能臻此公

身居祿位志不驕矜克遵象外之談不諱生前之事
遂於長安縣龍首原西距阿城東建塋域高崗雖枕
夏屋未封君子聞之僉曰知命夫人馬氏驥之女也
內備四德外諧六姻邕睦允暢於曹風折旋不虧於
戴禮不幸先公而歿有子四人長曰季常次曰季平
季華季燧或名參密侍或職列禁軍咸蘊構堂之姿
俱是保家之主以元佐性無飾僞文好直詞爰命紀
能庶旌實錄其詞曰

洪河孕氣兮嵩岳粹精聖君當馭兮哲人乃生才調
不羈兮智略縱橫器宇寢深兮量包滄瀛結髮從宦
兮捐私徇公弱冠受命兮臨人撫戎入侍丹陛兮三
接明寵出宣青塞兮九譯潛通功成位高兮鏘金拖
紫居安慮危兮先人後己去健美師老氏之玄言齊
死生宗大仙之至理自昔有生兮孰能不亡考彼靈
龜兮兆此龍崗或培或築兮高墳深穴爰栽爰植兮
青松白楊 上以公恪勤事主密慎左右至七年遷
監威遠軍使晝巡夜警衛士畏威敷奏闕庭衆稱其
美謂保貞吉以享百齡逝川不留奄隨朝露以元和
十二年七月一日遘疾終於脩德里之私第春秋七
十有四以明年七月廿日壬寅遷窆於長安縣承平

鄉先修之塋從其命也

石刻

魏匡贊

匡贊三衛出身元和間劍州晉安縣主簿

大唐故宣州司功參軍魏府君墓誌銘

并序

大人諱邈字仲方其先鉅鹿人寄居于京兆府咸陽縣積代矣頃因祿山暴逆鑿輿南征畿甸土庶皆爲俘馘由是圖籍毀致產業烟燼不可復知先人之事也此無以述曾祖賓皇仕隴州長史祖母王氏祖朝隱鄙惡浮名高尚其仕祖母栢氏伯父遜試左衛率府兵曹參軍皆不幸短命先歸黃墟且大人少履文

字貞元初以鄉舉射策上省者五六以賄援兼無竟不登第然當時稱屈者衆矣其後爲河陽節度使所辟隨逐戎幕處事詳明奏懷州參軍丁祖母憂不上後參選拜果州司戶參軍未上爲度支山南租庸使所厚抑志勾留共理鹽鹵官滿不舍其後懼以覆餗懇辭所榮租庸使韋公不勝其辭由是獲免旣而四海無業一家若浮遂携老幼而入關關中無投足之地賈居于萬年縣之勝業里顛然無託食於親知者首尾五祀出無車輿坐寡糧糗妻孥有含菽飲水之患無衣無褐之虞而我父不爲恥不隕越者以其知

止知足達於至理者也元和四年夏四月相府裴公
因人而知其善補待制官掌握絲綸廉慎益著地居
近密不發私書朋舊昵親由斯咸怨人雖欲遺之金
布斗粟曾不我容焉所謂蹈火不熱履霜堅冰其此
之由乎拜婺州司功參軍轉宣州司功參軍未滿今
年復有詔令之本官以其年十月十三日終于宣州
宣城縣之公館匡贊親侍靈舁明年歲次乙未四月
八日己酉葬于京兆府萬年縣之畢原禮也於戲大
人履善道踐古事亦已久矣而不曾極耳目之所觀
聽娛心意之所愛樂一生蹇蹇終日棲棲而死之日

餘俸不足以葬藏一身兒女無歌哭之地其不痛矣
然則庸非儉極乎孃趙氏試璧州別駕昇之女自罹
豐咎泣血終日加以孤幼纏繞疴羸殆深生男女六
人女三人長曰素恭嫁李氏仲曰季風嫁侯氏季曰
季雅猶未從人兒三人長卽匡贊仲曰文質皆三衛
出身季曰齊貢拜兗州都督府參軍丁此憂不上并
生遭不造少集荼毒酷裂煩冤無所逮及倉天倉天
噫大人積德累仁如此竭忠盡孝如此宜乎天地孔
昭神明大鑒享年有永降福穰穰者焉如何朝陽露
晞珪璋暴殞倉天倉天此贊所不以斯文託於人以

其情地崩迫冀其紀事之明也雖讚父之德則爲寵親而內舉不避且旌善人其辭曰

冲和降氣誕生忠良和順內積英華外揚靡暴于弱無凌于疆天胡不惠流毒禍殃情魂倏殞聲積彌彰千齡兮萬代共響乎遺芳

石刻

韋同翊

同翊鄉貢進士

唐故龍花寺內外臨壇大德韋和尚墓誌銘

并叙

大德姓韋氏法號契義京兆杜陵人也元和戊戌歲四月庚辰恬然化滅報年六十六僧夏四十五粵以

七月乙酉遷神於萬年縣洪固鄉之畢原遺命不墳不塔積土爲壇植尊勝幢其前亦浮圖教也曾王父諱安石皇尚書左僕射中書令大父諱斌皇中書舍人臨汝郡太守烈考諱衮皇司門郎中眉州刺史家承卿相德勲之盛族爲關內士林之冠始先妣范陽盧夫人以賢德宜家蕃其子姓故同氣八人而行居其次在女列則長焉自始孩蘊靜端不潔之性及成人鄙鉛華靡麗之飾密真心於清淨教親制奪其持愈堅年十九得請而剃落焉大曆六年制銖龍花寺受具戒於照空和尚居此法身本於天性嚴護律度

釋氏高之國家崇其善教樂於度人勅東西街置大德十員登內外壇場俾後學依歸傳諸佛心要旣膺是選其道益光門人宗師信士嚮仰如水走下匪我求蒙持一心之修繕佛宇來四輩之施捨金幣高閣山聳長廊鳥跂像設旣固律儀甚嚴率徒宣經與眾均福故聞者敬而觀者信如來之教知所慕焉嘗從容鄉里指於北原而告其諸弟曰此吾之所息也爲其識之嗚呼生歸於佛歿歸於鄉至哉其孝乎所以報生育劬勞之恩備矣窀穸之制成所遵承弟子比丘尼如壹等服勤有年號奉遺教杖而會葬者數百

千人極口氏之哀榮難乎如此迺沉礎而志于墓云迷方之人妄聚之身白日下臨苦海無津我得度門性□□□亦旣落髮於焉報親孝乎終始歸于故里

石

缺五南趾石字刻

賈中立

中立元和時人翼王府參軍

唐朝議郎行鳳州司倉參軍上柱國司馬君夫

人新安孫氏墓誌銘 并序

夫人字堅靜建業人也曾王父瑜睦司馬卽吳之洪允矣祖從朗錄事父愿皇慰望江咸襲繁祉垂裕後

昆夫人婉婉令淑挺然生知及笄年適于司馬司倉君窈窕閑雅謙和優柔行合規矩言堪典模恭理黍稷調暢琴瑟義光中饋孝顯家風綱衣無華舉案有則訓女四德示男六經親族姊妹肅然心伏凡在閨闈莫不書紳性止恬淡情忘嗜慾洞了生滅俄而謝世元和十五年五月十六日微疾夙瘳終于長安頌政里第也享年五十口以其年十一月廿二日將遷于國西阿城南原禮也嗚呼生事畢矣二女早逝有子長裕泣血哀號抑情就禮痛雍穆之風泯然斯絕刊石紀德庶幾不朽中立舊館之賓睹其家道不揆

爲銘未充名實銘曰

婉婉積善不享遐齡貞操符禮柔和合經尺波一謝寸晷罔停愛其芳烈刻石存銘

石刻

全唐文五百四十四有傳

全唐文五百四十四有傳

勅柳晟閩濟美進獻奏

前山南西道節度使柳晟授任方隅所寄尤重至於赦令理合遵行一時歸朝固違明旨復修貢賦有紊典章伏請付法又前浙東觀察使閩濟美到城亦有進獻當時勘者稱離越州後方見赦文道路已遙付

卷二十一
納無處既經恩赦須爲商量將誠來者之心必舉贖刑之典已書罰訖伏准今年正月制自今已後諸道長吏有離任赴闕廷者並不得取本道財物妄稱進奉苟有違越必舉憲章柳晟等既違新令不敢不奏

唐會要卷四十

張宏靖

全唐文五百四十四有傳

蕭齋記

隴西李君約於江南得蕭子雲壁書飛白蕭字以筆勢驚絕遂匣而寶之其遇之之由則君之贊序與崔

監察備論之詳矣君與字俱載舟還洛陽仁風里第思所以盡其瞻玩置之之宜則箱櫝臨視不時有緘啟動搖之變遂特建精室陷列于垣復本書之意得遙睇之美寂對虛牖勢若飛驚雖煙霧交飛虬鸞縈動輕旆翻颺微雲卷舒不能狀也李君以至行雅操知名當時逍遙道樞脫落榮利識洞世交神交古人而風致之餘特精楷隸所得魏晉以降名書秘跡多矣以不越於縑素之間未爲殊珍也蓋壁字奇縱乃爲希寶故異而室之文而志之意匠所得非常域也夫蕭之爲字也切然而清於文也蔚然而整宜乎銘

壁宜乎命齋蕭齋之名與此字俱傳矣

書苑菁華十三

按此文始見於張彥遠法書要錄題為大父高平公蕭齋記案彥遠為宏靖孫文規子見唐書張嘉貞傳諡則彥遠之伯叔行見宰相世系表自明刻要錄後附彥遠傳有自其大父稔有能書名句此記遂沿為諡作書苑菁華題作宏靖與唐書張嘉貞傳世系表合且較要錄多卅餘字姑錄存之

王仲舒

全唐文五百四十五有傳

國子博士韓愈除都官員外郎制

朝議郎守國子博士分司東都上騎都尉韓愈直亮廉潔博達而沈厚守經嗜學遂探其奧希古為文故得其精美宋玉之微詞尚楊雄之奇字為已求道暗然揚聲可行尚書都官員外郎分司東都

洪興祖韓子年譜

林藻

全唐文五百四十六有傳

深慰帖

辱問知所苦已減退深慰也承廿七日發時熱如此疾未全瘳冒犯而行得否善自度之如料氣力未禁何如改告別作逗留願審已而動勿使道路重復轉

更栖遑蒞那日送歐陽回至橫瀾便屬馬脊破爛潰
特甚不乘騎數來都不出入雖不得數至問疾常令
問中和知減損將謂程寬且將息不知發日頓近明
後閒暇得鞍乘當奉詣未際預懸離別之恨恨也拙
序不足奉揚盛美過言見謝無乃外歟崔鄭歐陽詩
付往章八元陳羽各有一篇未能取得續附也諸公
處申意尋當與達即冀展奉無復寒暄不宣藻拜手
廿三日 郭郎少公執事 先所仗寫文卷閑垂檢
出續令往取謹問寓意錄

合浦還珠賦節句

珠之去也山無色兮氛霧冥冥海無光兮空水浩浩
珠之來也川有媚兮祥風習習地有潤兮生物振振

閩書

林蘊

蘊藻之弟全唐文四百八十二有傳今次藻下

對賢良方正策

臣遠祖比干因諫而死天不厭直更生臣也福建通志

柳宗元

全唐文五百六十九有傳

唐清河張府君墓誌銘

案石刻署柳宗元名恐是後人所加姑存其
日文已見全唐文不錄

歐陽詹

全唐文五百九十五有傳

甲漢武帝文 并序

閱太史氏書見漢武之御極雖非求仁蹈道之主亦
英雄之君也然觀其內傳有學神仙築三山為飲露
猿霞希升汗漫激流企石用擬林泉嗚呼履其位而
不知所以守始其事而不知所以從夫一物各異道
萬策不同致帝王之與神仙林泉之與市朝猶鱗羣

毛族川陸分之日居月諸晝夜常之麒麟不可有處
淵蛟龍不可更居藪玉兔莫延於旦金烏罔瞻於宵
附其翼者兩其足與其角者去其齒不兼之義天理
昭彰帝者宜本於親人仙者宜先於遠世以林泉為
意者可居於草澤以天下為念者可謹於朝廷是以
唐堯虞舜無野心子晉許由辭寶祚誠以帝王與神
仙有隔林泉將市朝難并也今據唐堯虞舜之地而
求子晉許由之志不亦迂而可痛哉况君子所以推
心屈體為僕御元元所以割膏割血為飽煖非圖好
林泉而學神仙也故予覽其傳傷心久之戊辰歲秋

八月周覽秦原次茂陵之下既覩永歸之地彌懷所
行之事且夫承天統物豈無足稱之德歟蓋歎日月
高明有時虧異珠玉貞潔不免疵瑕徘徊路隅興言
而吊云

赫赫兮炎靈降神造漢焚秦四葉重茂翹英游新首
出群龍卓爲世祖秋風揚文夏日昭武柔不化之人
闕未名之土雖殊仁聖之后是異凡庸之主伊可膚
寸明有不周事非所事求非所求惟此帝謨想夫仙
道魚處重淵獸居茂草辨乎朝市別以林泉日由旦
陸月麗宵天跡旣兩分理難齊克若死將生猶南與

北貪臣王公鞅掌者可以勤萬機欲升汗漫逍遙者
可以爲匹夫愛深宮秘殿者可以垂旒纒好青山綠
水者可以棲江湖飲露參腥激流貫都苟能同致實
曰殊途堯舜曰聖由晉匪愚確乎守一亦以難俱况
乎小人唯唯罔圖山水君子乾乾孰爲神仙嗚呼哀
哉前監孔彰高臺深池夫差以戕尋山越海嬴政其
亡有一於此未或無殃胡爲不辰互窮厥方舟全虎
臂車出羊腸已臨隧炭幾絕苞桑反覆前閨痛心疾
首藥石無人瑾瑜有垢暑來寒往時移代久古壟將
頽惡聲不朽日臨宇宙有時而虧目覩毫釐或不見

皆將爲而不知復知而故爲嗚呼噫嘻本集

案此文據明刊本歐陽行周集與李觀所作字句不同

于方

方元和中秘書省校書郎

唐裴氏子墓誌銘

有唐故侍御史裴公諱琚知京北饋餉時夏州連帥韓全義以王命討淮夷不剋歸鎮德宗期孟明於異日釋而不問疑懼之甚而意端公焉遂有青蠅之間白圭成玷貞元十七年竟貶崖州澄邁縣尉至廿年

十一月終於南海明年靈輜北歸至襄陽夫人史氏在焉我之出也有一子曰承章聰勤遊藝精敏工文幼學之年迨成人矣而志慕賢才心尙善道人之所保不居過地可謂令子矣年十八娶扶風竇氏父瑞余之從祖姑之子七歲以孝廉登名太常文詞學業衣冠名表而四十五十遽歸泉裏孤女藐然歸于承章承章之事親也孜孜孝敬親之念承章也慈愛亦過至於跬步之間不見不得去年端公凶訃遠到襄陽承章哀號幾滅天性將奔迎焉親以其怯弱懼其毀也止而不許及護靈車由東洛將歸京師在路邁

疾若輕而未遽其及也至永甯竟終焉春秋廿矣殆
及屬纊精神分明辟母別妻意緒哀恨所謂天難忱
命靡忱善人而友顏子其如斯乎太夫人哀念愈痛
晝夜叫呼殆將不勝以元和元年四月將柩至城其
年十一月廿六日歸葬于城南陪先父之塋禮也雖
其未祿功德不被於人民而施於有正孝友已及於
親戚於此傷悼彌可以銘乃作銘曰
積善之家必有餘慶端公之仁有子之令其令維何
孝悌恭和孝悌而友天命如何佳城鬱鬱松栢森羅
年年孤月空此經過續語堂碑錄

劉禹錫

全唐文五百九十九有傳

擬門下侍郎平章事制

門下天地至大任四時以成功元首雖尊託三台而
佐理况外居黃閣入奏青蒲蚤亮王猷緝熙帝載以
相于位以安兆人必有夢卜之期式重將明之職求
其具位果獲良臣文苑英華四百四十九
擬中書侍郎平章事制
按此文見文苑英華題劉禹錫名今存其目

裴次元

全唐文六百十一有傳

京畿等縣不置員外試官奏
神州務劇官僚先多更置員外試官於事頗為繁冗
京縣近有此色天恩已令即停猶恐選曹更有注擬
望請當府及京畿等縣自今已後一切不置員外試
官

唐會要
六十七

楊嗣復

全唐文六百十一有傳

蜀武侯祠堂碑陰題記

予以元和初為臨淮公從事因陪刻石時序荏染二

十有七年今謬膺戎寄口繼前列謁拜祠宇顧瞻斯

文省躬懷舊不勝感幸

金石苑

崔羣

全唐文六百十二有傳

論諫議大夫張宿奏

諫議大夫前時亦有拔自山林然起於卑位者其例
則少用皆有由或道德章明不求聞達或材行卓異
出於等倫以此選求實愜公議其或事跡未著恩由
一時雖有例超升皆時論非允張宿本非文詞入用
望實稍輕臣等所以累有奏請依資且與郎中事貴

適中非於此人有薄厚耳

唐會要五十五

遂王正位青宮奏

大凡已合當之則有陳讓之義若不合當因何遽有

讓表今遂王嫡子長所宜正位青宮

唐會要卷四

竇羣

全唐文六百十二有傳

請宥郭子儀子弟與張氏爭財奏

張氏以子儀在時分財子弟不合爭奪然張氏宅與親仁宅皆子儀家事子儀素有大勲伏望陛下特赦而勿問使私自退省

唐會要六十

常參五品官請假奏

常參官假滿惟三品官至王府傅已上即於正衙參假其餘不在此限臣伏見諸司官或位列通班職居要劇其左右丞諸司侍郎御史中丞給事中中書舍人並是四品五品清要官不在參假例或彌旬曠廢皆不上聞或未滿一日例不舉奏臣今請尙書省四品官御史臺五品官中書門下五品官請假並同三品例參假曠廢必知勤惰無隱臣職當彈舉輒陳事宜

唐會要六十

直書會要
 品官制史
 官不仕置夾朱
 八品品四品正
 其制不五也
 品官至王
 品官至王



唐文拾遺卷之二十六

榮祿大夫三品頂戴前分巡廣東高廉道加四級臣陸心源輯

全武少儀

全唐文六百十三有傳

請明示何竦曹壽罪狀奏

太學生何竦曹壽等今月十四日有兩人稱神威軍
 官健本軍奉進止令追其人亦不言姓名緣神威是
 禁軍稱奉進止所由不敢隨去臣亦不敢牒問經今
 二日更不見迴官臣伏以何竦曹壽等學生之中素
 無異迹皆勤藝業臣職在監臨頗所諳委察訪遊處

不涉非違今忽被軍中騷收恐橫被註誤太學生胄
多來自遠方自見追此二人不知其故咸聞驚懼莫
敢保安何竦等儻情理難容伏乞明示罪狀加以刑
法如或枉遭誣執伏計必盡其辭冀無濫罰人知懲
警臣謬當承乏職領生徒令其干犯國章敢逃其責
册府六
百四

全唐文六百十三有傳

唐故朝散大夫秘書省著作郎致仕京兆韋公

玄堂誌

唐元和十四年三月廿三日公棄背于長安新昌里
私第享壽八十有三嗣子縝洎系練紆絢哀號于天
毀未敢死乃稽先王卜兆之義以明年五月一日奉
遷靈座耐于萬年縣洪固鄉畢原先太夫人太原王
氏之塋焉縝等咸以公潛耀道德不求顯著他人論
譏未能盡美盍自志之 公諱端字正禮五代祖孝
元後周大司空鄖襄公高祖津隋民部尙書曾祖琬
皇成州刺史贈禮部尙書祖季弼太僕寺主簿烈考
廉尙書庫部郎中自鄖襄公以盛業洪伐延耀後嗣
以至于郎中茂纘其德口官壽不至士大夫到于今

嗟稱之公卽郎中第二子也體苞元精天付全德孝友忠信莫匪生知以古之賢達有保身遺□□降其志不辱其身之道莫不洞與心契歸於一揆故常以恬曠自適怡攝爲宗是以家人忘貧位不稱德官厯率更寺主簿下邳縣主簿下邳陽翟二縣丞國子監主簿凡五仕三爲色養爲孤幼皆非公之志也自是之後蕭然杜門淮夷削平之明年皇帝在宥天下方弘孝理詔百辟父母存有顯擢歿有褒贈時纘爲工部郎中由是拜公朝散大夫秘書省著作郎致仕先太夫人追贈臨汾縣太君時謂公之義方纘之顯揚

斯爲至矣太夫人曾祖諱子眞皇襄州錄事參軍祖怡河南尹東都留守考毗昭應縣尉太夫人生令族德門稟柔明淵懿脩睦婦道裁成母訓輔佐君子踰廿年所以敬養先姑無違尤慈幼惠下無怨悔纘等不孝祿養未及禍罰已鍾而外族淪替靡所依倚是以霜露怵惕有加岡極之痛焉以貞元六年奉安宅兆至是蓋耐嗚呼蒼天纘工部郎中系陽翟縣尉練鄉貢進士紆兼殿中侍御史絢前太廟齋郎紆頑闇不類哀敬不文泣血書石以寘泉隧

石刻

全唐文六百十四有傳

唐故同州司兵參軍上柱國京兆杜府君墓誌

銘并序

嗚呼士君子表於代而列於薦紳靡間言由己之仁義是以而又藉性於和體道於仁遵坦衢泳天爵獨稟貞厚與令名相終始雖位壽或舛人且許之爲達矣公諱行方字友直京兆杜陵人也曾祖諱元志杭州刺史王父諱參謨陝州司倉贈禮部郎中烈考諱倫文術政事爲時龜玉異時選部第書判明廷策賢良皆登甲科價壓公論歷憲闡郎署而後出分符竹

公卽澧州府君之長子弱冠遊國庠以明經擢第釋褐任右司禦率府胄曹參軍久之從調授同州澄城縣丞三改秩至左馮翊司兵掾以太和七年秋七月十二日啟手足于上都昇平里之私第享齡六十問於龜策得十一月甲寅吉乃卜窆于萬年縣龍首鄉龍首原夫人滎陽鄭氏附焉夫人試秘書省校書郎稱之第二女操順淑朗先公十年而歿有子五人碩顥顥順其幼小字曰老老女子子二人皆柴立致毀弔賓爲之反袂公平生於分義最明四方名人洎中外族昆弟其或旅食靈臺求選京師懽然授館改星

霜無倦色閑探百家之言賦詩什頗道麗奄字缺四人
以命不可說相噙澣知公之事烈詳熟雪涕識□□
而銘之其銘曰

上缺四字兮昭令圖陰隲難詰兮或隆或污精金不試兮
良玉不沽清風可挹兮白日西徂野雲屯兮壘草蕪
永矣潛寐兮國城東隅古誌石華

李應

全唐文六百十五有傳按應元和中自戶部郎中授湖州刺史遷蘇州

請許百姓自酤奏

先是官酤代百姓納榷歲月既久為弊滋深伏望許

令百姓自酤取登舊額仍許入兩稅隨貫均出依舊

例折納輕賫送上都冊府五百四

王播

全唐文六百十五有傳

榷鹽利付度支奏

應管江淮兗鄆等鹽院元和七年計收鹽錢六百八
十七萬四千四百貫比未改法已前舊鹽利摠約時
價四倍加擡計成虛錢一千二百一十七萬九千貫
其二百一十八萬六千三百貫糴鹽本其一千四百
九十九萬二千六百貫充權利請以利付度支收管

册府四百九十三

糶鹽加價奏

揚州白沙兩處納糶場請依舊為院又請諸鹽院糶鹽付商人請每斗加五十文通舊二百文價諸道處煎鹽場停置小鋪糶鹽每斗加二十文通舊一百九十文價

唐會要八十八

御史在任減月轉準奏

監察御史舊例在任二十五月轉準具員不加今請仍舊殿中侍御史舊例在任十三月轉準具員加至十八月今請減至十五月侍御史舊例在任十月轉

準具員加至十三月今請減至十月

唐會要卷六十

鹽戶不許追擾奏

應管煎鹽戶及鹽商并諸鹽院停場官吏所由等前後制勅除兩稅外不許差役追擾今請更有違越者縣令奏聞貶黜刺史罰一季俸錢再犯者奏聽進止

唐會要八十八

孟簡

全唐文六百十六有傳

常平義倉州縣得專奏

天下州府常平義倉等斛斛請準舊例減估出糶但

以石數奏申有司更不收官州縣得專以利百姓唐會要

裴埴

全唐文六百十六有傳

史館修撰一人判館奏

史館請登朝官入館者並為修撰非登朝並為直館
修撰中以一人官高者判館事其餘名目並請不置
仍永為常式唐會要

李逢吉

全唐文六百十六有傳

祭天地社稷用樂如舊奏唐會要

昊天上帝五方上帝皇地祇神州社稷之祀謹按禮
記喪三年不祭惟祭天地社稷按周禮及開元禮園
鍾之均六變天神皆降林鍾之均八變地祇皆出謹
按不廢天地之祭謂不敢以卑廢尊也將祭必作樂
者所以降神也苟有所闕則祭不成禮伏請準元和
元年二月勅用樂如舊三年之內不祭宗廟山陵祔
廟後四時饗祀如式唐會要

張濛

全唐文六百十七有傳

具賜爵例奏

伏准貞元元年十一月制三品已上賜爵一級四品已下加一階者臣謹詳制旨本以三品已上其階已貴故賜爵四品以下其階未貴故加階伏緣請條不標所限司封據品通取職官其有官是三品已上階是四品已下者遂以階敘階又以官敘階爵比於官階等者受賜偏優臣欲准狀覆成則慮於比濫檢條破格復無以依憑官既隨用則遷階乃累考方至泛恩敘爵理合從階若許兼約職官伏恐競為覬倖臣今謹具賜爵例如前望為永式

唐會要八十一

段文昌

全唐文六百十七有傳

秋氣帖

總不得書何為如此秋氣稍冷不知當如何也有華

消息可報委曲十四日報寶真齋法書贊

陸渚

全唐文六百十八有傳

祀武成王議

臣聞統天下者禮法也救天下者權數也拯難者常以權變禮以數易法有國者則尚德而賤數尊卑而

晦權何者禮法行則人安其分而務于修身權數騁則人思變常而務于苟得安其分理之源也思變常亂之本也故救一時之弊者事不可貽于將來法垂萬祀者道不必行于當代竊以武成王殷臣也見紂之虐不能諫之而佐武王以傾之于周卽社稷之臣矣于殷謂之何人哉不然者何其效拯橫流業授役寰孔聖片言以褒之議知神化樹勛猷宗伯周書無篇以紀之豈不以其事不可傳言不可訓耶且夫尊其道者必師其人師其人必尙其行使天下之人入是廟也登是堂也稽其人可以見師思其道所由至

法則俾夫立節死義之士安所措其心乎聖人所以宗堯舜賢夷齊不法桓文不贊伊呂先之以敬讓遵之以禮樂蓋謂此也况文武之道非二宗猶天地之有陰陽時日之有晝夜相依而立相須而成故王者之制因此而爲伍因伍而爲鄉因鄉爲軍鄉有六故置六卿居常可以理人有難足以應敵間長黨正卽率五焉師師卽大夫焉下建立皆遵其制故將將卽正卿也執人病卽元帥也暨乎戰國陵夷王道蕩口成于二取不顧典刑遂有孫吳之口畧興起剪之才用文武之事異將相之職分蓋基于此始也今聖上

纂祖宗之鴻猷建中興之盛業方將口頽波于千古
垂格言于後昆猶使武成之名與文宣為偶權數之
畧與道德齊衡恐非不刊之典臣愚謂宜罷上元追
封立廟之制依貞觀于磻溪置祠有司以時享奠斯
得禮之正也

大唐郊祀錄十

案全文六百十八所收與此不同

李道古

道古嗣曹王臯子舉進士擢校書郎集賢院學士歷
利隨唐陸四州刺史代柳公綽鎮鄂岳召為宗正卿
以薦所善柳泌斥為循州司馬終以服丹歐血死

睦州大廳記

任地列封有國之恒制張官考績王者之大轡故監
部分刺世官為重秦漢之來也隋新定郡武德四年
改為睦州嘗析桐廬為嚴州復為東睦州尋併為屬
邑領縣六建德桐廬清溪分水遂安壽昌幅員一千
二百里大山經川陵陸畏壘居七十萑蒲斥澤田植
之壤居十二其餘中田小畝之數一農夫而食十人
官或旁詔殘以漁利單戶危鄉歲虛籍計肆朝廷難
其任也泊于山峻二江合會之勢龍門疏鑿矣轅轅
東扼矣丹巘闊聳遠通海水巖險呀豁斗絕鄰部士

族豪家望走洞穴刑理不直或頓機網故郡其新定
 州其睦若日親敬大化其封也自國家有兵甲之費
 不實內府經用所入浙右重於江淮茲郡重於它郡
 加以鐵官鹽策盡服其籍調租過於太半自息而應
 征蓋所以天不奪時人無其力也前時茲郡多命德
 賢風化所寢父兄成教君子爲之斯可一變而至於
 道也始自永徽仰書名氏森然在列以識遷授元和
 七年甲子歲記具錄累代刺史名銜除授年代如後

嚴陵集

張西岳

西岳元和時人

銅山湖記

粵有銅山湖者即我南陽葉侯字再榮之所建也頃
 因皇唐元和始載江左允癘民人歎絕之次我葉侯
 而獨怡然所怡者蓋由心能遠慮廩有積粟旁觀衆
 餒之輩而無宿備者矣遂謂鄉人曰沒者已沒存者
 須存豈不見銅山之北谷嶺之陽左巒右隴之內仍
 有寶泉一眼水涓涓而涌氣炯炯而吐磨砂旋歐騰
 汨汨無冬無夏不減不縮四顧平仰迴合堅貯實可
 以爲湖者哉然君子所居必有隣焉德鄰者誰與即

有下邳余鼎鄉尹黃芝童雲等數人智計相亞皆以
道同意合俱時響應起元和二載歲次丁亥二月中旬
有二日下手築捺月纔半而功畢畢功之日清波溢
岸汎羃羃之晴煙澄鬱鬱之曙月植戶四十溉田三
頃平深一丈已上周迴四百餘步可謂形穿鏡範圍
瀉虹規鵠鵠弄影兮乙項鷓鴣登翼兮倅背春藻未
生瀉天形而淨盡夜風纔息點星彩而無遺倒疊山
光則林花笑底翻鋪雲影則玉葉捍心就知變化由
人澄虛在水既得東塘永固而南畝無憂汪洋雖小
於鏡湖運智而深於太守乃恐代之遷變後來者不

知前之所能僕雖不才聊述湖主之言而爲記之

越中金石記

崔歸美

歸美元和中鄉貢進士

唐故文貞公會孫故穀城縣令張公墓誌銘序

公諱曠字繼明范陽方城人也漢功臣留侯之後五
代祖策梁岳陽王諮議參軍贈持節蔡州諸軍事蔡
州刺史諮議生玠爲周宣納上士隋巴州錄事參軍
參軍生則隋比陽灋陽二縣令高祖立弼唐長安縣
尉益府功曹參軍贈都督安隨沔郢四州諸軍事安

州刺史曾祖柬之故特進中書令監修國史上柱國漢陽郡王贈司徒配享中宗庭廟祖名嶧高道不仕考諱愿皇駕部郎中曹婺等十一州刺史吳郡太守兼江南東道廿四州採訪黜陟使自岳陽至于採訪皆累葉重光奕世載德或補天之績或黜陟幽明嘉祉未泯遂生我公公即採訪之第八子也起家以門蔭解褐補太常寺奉禮郎旋授左武衛兵曹參軍貞元中皇帝追先帝舊臣子孫以荅功績遂進補右神武軍錄事參軍在昔高宗外戚擅權密構神器滔天之禍如火燎原區宇版蕩上慘下贖荆棘道路人思

息肩天未移運碣降元老洎產祿潰計皇綱荐紱鯨鯢曝鯁祥慶委積公竟以非罪中禍謫竄遐裔景公干駟無德而稱夷齊首陽萬古嘉歎公嘗念先祖有大功於國寵被一門裂土分茅綸翰盈篋身歿之後名謚篋然決意挺行懷表詣闕志誠幽贊達于聰明匍匐雪涕帝用增歎廼降明詔自宰臣已下集議行跡謚爲文貞五王同時賴公之力也朝廷嘉其憤激抗表極論可謂孝子孝孫弓裘不墜遂特授襄州穀城縣令其在邑也彈琴靜理高視雲水仁以變俗德以臨下吏不敢欺盜不犯境舉直措枉黔首欽服西

門在鄴子產治鄭幾不若也辭秩之日寮吏色沮遮
 車固留公久想故園去如脫躡思與白雲長往探蕨
 冢山類鴻鵠之在冥同騏驥之解絆不幸因疾纏綿
 不起以元和八年六月十九日歿于私第嗚呼上天
 不惠殲我良士聞者交涕舊邑罷市豈不以仁於斯
 德於斯公享年六十七以其年十一月廿三日附于
 大塋禮也冢子珣先於公一年而卒次子瑀瓌璟等
 銜哀泣血而言曰桑田有變陵谷遷改若無旌識何
 以號訪請刊貞石銘以誌之余以子聳之情授簡而
 退敢為銘曰

文貞之孫採訪之子洎于我公令問不已其德如山
 其臭如蘭久而彌芳萬古不刊石刻

邵仲方

仲方元和中將仕郎試太常寺奉禮郎飛騎尉

唐故元從奉天定難功臣游擊將軍守冀王府

右親事典軍上柱國勒留堂頭高平郡邵公

墓誌銘 并序

夫生滅之相貫于天地盛衰之門業推而化故期生
 誠榮祿奄歿幽泉机茲褒嚮之靈刻石於元扁之記
 典軍諱才志字元甫望出高平萬年縣人也曾諱慶

皇不仕祖諱儀皇不仕父諱明皇任昭武校尉守恭
王府左帳內副典軍上柱國賜緋魚袋公卽長男也
立身從仕卅餘年自建中四年癸未歲朱泚寇逆陷
歿城墀執持堂印隨駕奉天重圍之內苦歷艱危克
復之時功勳崇獎遂遷五品職佐台堦累序勲勞歷
更九任勤劾幹蠹靡資台鼎孝奉家慶之休廉謹風
猷之德遂至元和十四年八月廿七日藕遇朋友酒
筵至夜有司糾劾以達聖聰詔下書刑貶於坊鎮又
遭寒熱伏枕數旬有嗣子全亮儒直奉孝過於孟孫
悲泣跪藥甚於韓伯孤妻張氏親看扶舉洗浣哺食

食不知味寢不求安弟曰才應官任清資職司樞密
朝入公門暮歸奉孝恭敬悲念乳藥哺食在處求醫
藥餌無效豈期壽限將畢大願不從時年春秋五十
有五至元和十四年己亥歲九月廿七日終於坊州
館舍嗣子等號天泣血聲一舉兮三絕女及於姪新
婦等感悲慟哭傷痛四隣卜筮有期至其年十一月
十六日舉葬于長安縣承平鄉史劉村附先代塋之
禮也仲方素諳有德乃述其詞銘曰

典軍功効安國理民重圍之內印信奉陳光榮先祖
忠直事君孝義奉母哭竹求辛身敗四時久疾癯羸

醫藥無愈奄有云亡魂歸逝水形影無光幽局悄悄
歸於北邙筠風吹竹悲聲白揚年年松柏空嚮泉堂
續語堂
碑錄

沈超

超吳興人元和中攝魏成縣令前守巴州盤道縣令

崔文公魏成縣靈泉記述

崔司業融當久視元年莅斯邑也刻靈泉記於此巨
石焉迄今正百年矣人莫得知超以公務之餘覽盧
公照隣放生池碑於西墅有好事者大梁文縱曰昔
崔文公有記存於石堂觀焉遂不俟車馬蹶然而至

薙離披之蔓草鏟狎獵之封苔鳥跡依然匪磨匪磷
嗟乎以公之德而發跡於斯以公之文而鬱蒼於此
百年已降後進君子曾不稱之者歟超叨承下風祇
訪高躅寓目增慨臨文永懷不腆之詞輒紀其年月
云爾元和四年歲次己丑三月三日攝令沈超記石
苑

王鉅

鉅元和時人鄭州滎澤縣尉

按與天祐中知
制誥王鉅疑別

唐故河東裴公墓誌銘

并敘

公諱昌字仲達其先河東人也保姓受氏其來遠矣

洎永嘉之年衣冠南渡風流遺烈代有其人禮樂摛
紳顯于家諫曾祖元凱祖明達父仁安並徽懿盛才
昭振前列望高族茂勲華貫時公卽府君之第二子
也稟滄和之性有堅貞之操以德行立身以仁信交
友志尙閑逸不以祿利爲榮是以不屈節折腰耽玩
琴史實朋執之龜龍仁物之衡鏡隱淪混跡洞達窮
通道在其中矣於戲有至行不享其福壽者其斯之
謂歟以元和十五年正月十七日遇疾終於長沙郡
湘潭縣之江次享年八十五嗚呼夫德立而人世不
稱行成而幽靈無報短長之制命耶以先塋松柏陪

葬尙賒禮許從權乃於上元縣鳳臺鄉梅頂岡之東
北原別建兆域以其年八月二日權窆焉從吉兆也
夫人吳郡朱氏淑慎忠厚行成閨門內政有敷義光
詩史有子五人長曰興次日幹次日超次日孚詩禮
垂訓教及義方識度自然哀不逾禮幼子曰祐先公
而亡有女二人長適彭叔雅次適蔣幹皆蓄令德事
舅姑有聞蔣氏愛女早謝浮榮亦先公而卒令子慮
陵谷遷變見託斯文採摭行能勒銘貞石其詞曰
於惟裴公凜然循德在醜不爭惟人是則樂天知命
道達通塞栖心雲水處事寂默泐漢沂江東西南北

其天胡不惠哲人其萎大樸已散瘴風不歸丹旄翩
翩新隴巍巍泉門一閉與此山垂其二古刻叢鈔

李泐

泐雍王房六世孫營田判官前殿中侍御史內供奉
又官司封郎中見郎官石柱題名

高涼泉記

魏成縣南五里有長嶺雖岷峨支派似無他異其陽
崖巖高松涼泉夏不知暑其陰竇藏靈境怪石人未
之造攝令吳興沈君超好古之士為政之暇冥搜得
之異日子乘輶一來沈君謂子曰山無泉不靈泉非

山不清然則凡嶺突兀雖大而頑汚池淪漣雖廣必
泥良不并也我有奇曠子能覲之乎子齋誠以往果
有所駭其始至也則風於一山玉溜潺湲衆籟成吟
笙竽匪禁登之洗然如謁羣仙心意自殊若與道俱
橫石如隕匪鑿匪鑿傍架絕壑根山不落下磨曾霄
屹然岩岩其間可俯而入焉則空洞博敞如堂如室
苔駮古狀奇怪生妍誰開混元益偉造物然則始知
夫山林獨往之士一丘自足窮年忘歸亦何必察耕
父於清冷送白日於昧谷然後為異也傍得舊銘隱
磷餘字即久視元年崔司業融首莅茲邑高謀有禱

刻石斯存地繇古觀廢非一祀沈君必將復其層構
招置道流以識前修且彰今躅漁陽李洛客評之曰
夫躁靜根性興廢繇人昔正明與孔聖同好惡今吳
興發文公之勝槩恬智之域若合符然矧沈之力政
嗜學實希曩哲斯境也適丁斯時爲不朽矣後之好
事者亦奚必陋今而榮古哉元和四年閏三月十二
日記金石苑

劉士舉

士舉元和時人

唐故彭城劉府君墓誌銘 并序

府君諱通其先彭城郡人也家承漢緒德襲堯風門
稱碩儒世躡高位父諱滔養真不仕處順而安唯道
是從居簡無悔靈鑒豈惑慶流不私况府君性口天
姿幼沐庭訓式備詩禮之義克修敬慎之容口惟睦
親謙以和衆豈在遐邇其誰不瞻奚圖上天止賦申
壽奄折梁木旋萎哲人以元和八年九月十日終手
揚州江陽縣崇儒坊之私第享齡七十矣夫人清河
張氏蟾宮降德虺夢膺祥聲華旣芳容範增肅鳳唱
斯洽龍光奄分離魂九昇衣臨三絕男一人名士舉
恭惟四德言念孝思爰自執喪毀過常制泣奉龜策

將謀所安人神叶心靈兆彰吉以其年十月十八日
 丁酉躬護喪擯安厝於江陽縣嘉寧鄉五乍村之原
 禮也恐陵谷有變乃刻石紀德銘曰
 漫漫豐谷霏霏楊雲盛德不亡逮生府君智實天假
 學如素聞光景莫留英靈已分奄十五年屹為一墳
 川水夜流松煙晝昏空有書劍傳於子孫石刻

唐故南陽張夫人墓誌銘 并序

夫人張氏其先陳留郡開封縣人也今標時望移家
 淮楚今遂揚州江陽縣人矣曾祖峴處性廉儒風規
 可則門標仁孝名立其德祖潛風雲稟性忠孝立身

能混於世居然自真父洽運務忠幹奉公克勲才聞
 八座位參孔隣夫人即公之第三女也三儀遠著五
 德流鄉意能柔順貞明內儀纔始登笄旋歸彭城劉
 氏自結秦晉無虧婦禮舉按之風入室綢繆豈絕恭
 姜之禮夫人承大家之餘訓受母師之典教何圖天
 奪斯壽魂魄上昇體掩泉門歸于逝水粵以元和元
 年八月六日奄終於江陽崇儒坊之私第享年卅有
 九夫人育子一人曰士舉夙承雅訓早著令名哀號
 泣血哭踊無聲即以其月廿五日窆于嘉寧鄉五乍
 村禮也故刻茲貞石永為記之銘曰

皇天不仁殲我慈母浮雲往來清魂何去不見慈顏
空悲風樹灑淚灑血朝朝暮暮

石刻

夫人曹氏于八月十日士學風承華時早暮命各哀
海八月六日李氏于五月朔崇壽氏之妹兼奉事世
事洪壽與士長翁齊泉門識于波木學以天味天
夫之歸夫人承太公之俗傳受世嗣之典燁仰圖天
其自慈奉晉燕燕歌頌舉對之風入室際懸豈豈恭
而流徽意指柔肌貞烈內蕭蕭欲登於茲誌述焚
八皇姑慈氏制夫人即公之策三文世三蕭教善正
其歸於世然自真父命聖德忠神奉公京曠木開



唐文拾遺卷之二十七

榮祿大夫三品頂戴前分巡廣東高廉道加四級臣陸心源輯

景審

審南陽人元和中試太常寺奉禮郎工作詩留心翰

墨

一切經音義序

昔者素王設教著十翼而通陰陽玄帝談經演二篇
而明道德豈能仁出代獨步迦維會三乘於鷲峰轉
四輪於鹿苑絲是有半滿之字敷貫散之花因緇客
而西至驅白馬以東邁是知不無不有掩蔽邪徒卽

色卽空甄明正道於是慧雲蓄潤垂發黷而蔭羣氓
法雨含滋散空濛而霑眾艸斯之功利不可勝言大
矣哉覺皇之爲教也若乃書之貝葉編諸海藏結集
由飲光之心文義宣慶喜之口流傳此土七百餘年
至於文字或難偏傍有誤書籍之所不載聲音之所
未聞或俗體無憑或梵言存本不有音義誠難究諸
欲使坐得明師立聞精誼就學無勞於負笈請益詎
假於摳衣所以一十二音宣于涅槃與典四十二字
載乎花嚴真經十二音是翻梵字之聲勢也舊云十
四音誤也又有三十四字名爲字母
每字以十二音翻之遂成四百八字共相乘轉成一
十八章名曰悉談如新涅槃經音義中廣明矣故

曰無離文字解脫也暨國朝初有沙門玄應孤標生
知獨運先覺明唐梵異語識古今奇字撰一切經音
義一部凡二十五卷可以貽諸後進光彼先賢作彼
岍之津梁涉法門之鍵鑰次有沙門慧苑撰新譯華
嚴音義二卷竝編於開元釋教錄然以後譯經論及
先所未音者至於披讀講解文謬誼乖得失疑滯寡
聞孤陋莫有微通多見強識罕能盡究然而自傲之
輩恥下問而不求匿好之流忝深知而不答則聖言
有阻能無悲焉有大興善寺慧琳法師者姓裴氏疎
勒國人也則大廣知不空三藏之弟子矣內精密教

入於總持之門外究墨流研乎文字之粹印度聲明
之抄支那音韻之精既瓶受於先師亦泉瀉於後學
鞮譯迴綴參於上晉師掇其闕遺歎其病惑覽茲羣
經纂彼詰訓然則古來音反多以傍紐而為雙聲始
自般虔元無定旨吳音與秦音莫辯清韻與濁韻難
明至如武與綿為雙聲企以智為疊韻若斯之類蓋
所不取近有元庭堅韻英及張戩考聲切韻今之所
音取則於此大略以七家字書釋誼七書謂玉篇說
今正字文字音義
開元文字音義七書不該百字咸討又訓解之末
兼辯六書庶因此而識彼聞一以知十師二十餘載

傍求典籍備討經論孜孜不倦修緝為務以建中末年
剏製至元和二祀方就凡一百軸具釋眾經始於大
般若終於護命法總一千三百部五千七百餘卷舊
兩家音義合而次之標名為異兩家謂玄
應慧苑等浩然如海
吞眾流以成深皎兮若鏡照羣物以無勸元和十二
年二月三十日絕筆於西明寺焉審以頗好文字擇
善從之許為不請之師自媿未成之器因啟其卷乃
告厥功謬以微才叙之云爾東洋刊慧琳
一切經音義

李遊

遊元和十三年京兆尹

處分官徒奏

諸司使諸軍所由官徒等共九十四人挾名伏檢元和二年三月敕並委京兆府比從十年更無逃亡補替等處遂使影占文牒散在村坊凡欲差役皆無憑據臣祈請諸司案舊名額自元和二年其逃亡補替挾名鄉縣牒臣當府令別與左右神策金吾軍伏乞聖慈一例處分庶明區別永久有常

唐會要七十二

杜英策

英策元和四年爲安南都知兵馬使兼押衙安南副都護

舉張舟政蹟狀

舉本管經略招討處置等使兼安南都護張舟到任已來政績事安南羅城先是經略使伯夷築當時百姓猶甚陸梁纜高數尺又甚湫隘自張舟到任因農隙之後奏請新築今城高二丈二尺都開三門各有樓其東西門各三間其南門五間更置鼓角城內造左右隨身十營前經略使裴泰時驩愛城池被環王岷崙燒燬並盡自張舟到任後前年築驩州城去年築愛州城裴泰時軍城不守軍中器械卻失並盡趙昌到任日近旋除廣州自張舟到任諸道求市每月

造成器械八千事四年以來都計造成四十餘萬事
 於大廳左右起甲仗樓四十間收貯安南戎寇難利
 鬪戰先有戰船不過十數隻又甚遲鈍與賊船不過
 相接張舟自創新意造艨艟舟四百餘隻每船戰手
 二十五人掉手三十二人車弩一支兩弓弩一支掉
 出船內迴船向背皆疾如飛唐會要七十三
 李鄘鄘字建侯邕從孫第進士補祕書省正字擢累吏部
 員外郎進御史中丞憲宗初由河東節度召拜門下
 侍郎同平章事以太子少傅致仕卒謚曰肅

停高陵等四縣烽子奏

三原高陵涇陽興平等四縣兵管烽二十八所每年
 差烽子計九百七十五人遠近無虞畿內烽燧請停

唐會要七十二

崔直

直元和中為御史中丞

知彈御史被彈待罪奏

元和十二年御史臺奏請知彈侍御史被彈即請向
 下人承次監奏或有不到即殿中侍御史於侍御史
 下立以備其闕臣伏以朝官入閣失儀知彈侍御史

合彈奏錯失向下侍御史及中丞大夫遞相彈奏事
後入本班候監奏出閣然後合侍御史待罪此乃殿廷
舊制於事爲宜今若移一殿中放彈御史之下以防
向上失錯或殿中自錯則擬更立何人向下監奏繫
於瞬息只合知彈侍御史便了不必別差殿中既乖
故實終慮駁雜伏請自今已後卻依閣內故事縱知
彈侍御自有錯失不被彈奏候班退監奏畢然後出
待罪冀從易便永可遵行

唐會要
六十二

鄭元修

元修元和三年爲京兆尹

命婦喪葬節制奏

王公士庶喪葬節制一品二品三品爲一等四品五
品爲一等六品至九品爲一等凡命婦各准本品如
夫子官高聽從夫子其無邑號者准夫子品廢子孫
未有官者降損有差其凶器悉請以瓦木爲之

唐會
要三

皇甫鎛

鎛臨涇人貞元初第進士歷吏部郎中遷司農卿時
方伐蔡急於用度鎛嚴辦濟師帝悅遂同中書門下
平章事巧媚自固以薦柳泌穆宗立貶崖州司戶參

軍死其所

權借外命婦院置官典院奏

舊例平章事判度支並中書省借闕官廳置院臣以爲事體非便今請權借外命婦院內舍十數間隔截置官典院又舊例置郎官二人於中書判案人中差定并量抽官典七人隨官勾檢文案伏以臣職在中書務兼司計錢穀事重須自躬親臣今酌量簡要並自判抽其餘尋常公事各有本判郎官今依條流勾當處置臣仍請每月二度候中書事簡入南省

唐會要五

三十

竇易直

易直字宗元始平人明經擢第補校書郎元和六年進御史中丞觀察浙西入爲戶部侍郎同平章事封晉陽郡公卒贈司徒謚曰恭惠

詳議僕射答拜儀注奏

臣謹案唐禮諸冊拜官與百僚相見無受拜之文又諫議大夫至拾遺御史中丞至殿中侍御史並爲供奉官不合異禮今僕射初上之日或答拜階上合拜庭中因循踏駁之制每致沸騰之議伏請下尙書太常禮院詳議永爲定制使得遵行

唐會要五十七

劉遵古

遵古元和四年任監察御史

太廟五享攝祭差三公奏

太廟五享攝祭三公等伏准開元二十五年七月八日勅每至五饗之日應攝三公令中書門下及丞相師傅尚書御史兼嗣郡王擇德望高者通攝諸司不在差限者伏以太廟攝祭公卿准勅令先差僕射尚書及師傅等如無此色官亦合次差諸司三品比來吏部因循不守勅文用人稍輕伏請起今年冬季已後勅吏部准勅差定如僕射尚書等闕即差京師三

品職事官充

唐會要十八

王源中

源中字正蒙累遷左補闕轉戶部郎中侍郎擢翰林承旨學士出為山南西道節度使入拜刑部侍郎卒

而獲罪犯歸有司奏

夫臺憲者綱紀之地府縣者責成之所設有罪犯宜歸有司安有北軍勢重於南衙輦下權傾于仗內乞還法司庶平職分

冊府元龜四百五十九

陸庶

全唐文六百五十二有傳

爛柯仙躅圖謀詳矣觀夫巨石橫空矯如驚龍萃岬
劃坼際於穹崇南走羣峰北控遐陸不遠人世宛如
蓬瀛得非權輿之初俾宅真仙而幽贊人民脫籠檻
於茲地不然者擾擾塵跡瀟灑靈踪高步遐矚相瞬
而致則樵夫之遇三仙其所以示化與何元造無朕
而壺中之日月可得而窺矣庶牧於是邦迨茲五祀
政惟自守民亦安止乘春多暇爰契心期冥搜信宿
機慮如洗頽然性復於靜靜復於真天地之萬類吾
生之憂樂將不介於胸中矣心境相傳不知吾之遇

靈境與靈境之遇吾與時元和三年三月十八日

按此文據嘉靖衢州府志與全唐文所收畧有不

同

趙昂

全唐文六百二十二有傳

官左金吾衛倉曹參軍翰林院學士賜緋魚袋

故朝議郎行內侍省內寺伯上柱國劉府君墓

誌銘 并序

公諱奉芝其先彭城人也著姓史策略而不書曾祖
寶皇右領軍衛折衝都尉祖敬皇左衛果毅都尉父
柱贈將作監公監之第二子夙奉嚴訓早聞詩禮謙

和仁厚履信資忠口不茹葷心唯奉佛解褐拜內坊
典直秩滿授內府局丞無何轉本局令尋遷內寺伯
自出身事主廿餘年三命益恭四知尤慎言辭謹密
體貌魁梧帶盡十圍眉間一尺出入宮禁周遊里閭
望之儼然真天子之近臣矣如何位不充器天不與
年未及懸車忽焉就木以上元元年十二月十九日
大漸于輔興里之復居時年六十五公素有通識不
以天壽嬰心故自卜龍首原用開瑩域土周石椁將
反本而歸真以今上元二年辛丑歲正月丁亥十一
日丁酉與前夫人趙氏合祔而同穴安時處順不亦

禮歟嗣子景延庭倩等號天叩地泣血崩心充充有
窮杖莫能起至於小大歛服塗車芻靈啟殯祖庭備
物致用皆取制於右監門衛大將軍伯將軍自公之
亡也悅如有失憂色慟容拊膺而哭曰天乎奈何不
先罰於予而乃降禍於汝手足云斷心魂得安人有
聞之知將軍之爲兄也仁矣昂學舊史氏書法不隱
舉善無遺庶旌恭友之風以成褒貶之義銘曰
劉氏之子公山正禮白眉皆良伯仲一體同事昭代
威儀濟濟□何爲乎奪我令弟能建生死自爲石室
啟手知全長辭白日合葬非古周公已來哲婦早世

同歸夜臺舟壑忽遷孰知棄海唯公令名終古不改
刻石

呂溫

全唐文六百二十五有傳

唐故銀青光祿大夫京兆尹兼御史大夫上柱

國贈吏部尚書京兆韋公神道碑銘并序

工之良者斧斤神運不離繩墨之內士之全者器用
無方必歸忠孝之域若離繩與墨而廈屋立構大匠
以爲妖也失忠與孝而功烈幸成君子以爲亂也除
妖討亂獨立中道以人倫風俗爲己任吾聞其語而

見其人公姓韋氏諱武字某京兆杜陵人也其先命
于商顯于漢蟬聯于晉魏之後或哲或謀或肅或艾
大名大德大節大勲懸諸日月倬在圖史族姓之盛
莫之與京曾祖皇朝金紫光祿大夫尚書左右僕射
同中書門下三品諱待價致君皇極時憚其正祖銀
青光祿大夫梁州都督諱令儀布化南夏民懷其惠
父舉進士宏詞制策皆入殊科又判入高等累任畿
赤名尉遷朝議大夫監察御史轉殿中御史侍御史
尚書禮吏員外中書舍人給事中擢禮吏戶三侍
郎亦列名藩及列卿之清者時年四十九而薨然亦

由不一其名字故家傳略而不盡也贈二部尚書諱
鑑時方大用士痛其天公未免懷而孤六歲知慕每
問居處几杖則失聲啼叫廢絕于地雲物與之變色
烏鳥與之悲鳴况夫搢紳之履霜露者元中書載公
之先執泣撫其首目爲孝治之瑞衣無兼綵食去鮮
味若居喪者數歲年十一始以門第補右千牛歷京
兆府參軍高陵櫟陽萬年三縣尉長安縣丞晝則遊
刃吏事夜則服膺經籍循性爲學深於禮服願行爲
文長於議論曾未壯齒鬱其老成顏太師眞卿蕭黃
門復以雅道名節自居罕有及其門而皆與公爲忘

年之契由是振動於卿大夫閒擢爲太常博士草朝
廷之儀大事不繁小事不略謚人之行褒者不德貶
者不怨德宗西狩委室隨難除殿中侍御史執簡於
亂兵之中顧指風生邦憲不撓皇輿反正猶踐舊職
崔大夫縱雅相推重動靜咨度方表公爲侍御史副
總臺務會戶部元侍郎琇董司漕運懼不克濟奏授
公倉部員外郎充水陸轉運判官得公之謀而不能
用與道進退義無論胥稱疾杜門數月而元果敗朝
野之論服其賢明尋轉禮部員外郎上方以戡復之
慶親告郊廟大兵僅解百度各缺執事憂惑悉咨於

公公以變通之識酌于宜□備物約用禮成掌中羣
司遵行罔或愆素屬邦畿艱食朝議敦本選臺閣之
通理術者十人分宰大邑公與故相國鄭公珣瑜等
同被推擇遂檢校本官兼昭應縣令時東后繼覲館
無虛日王人急宣冠蓋相望縣道之弊昭應爲劇公
內結信惠務穡勸芸而農不釋耒外運才敏儲費應
卒而實不乏饋傳置如市田間不知改遂州刺史郡
中地狹江隘屋室駢接歲有潰決焚如之害公順勢
疏壅峻其隄防而暴潦泄去申禁嚴備開其蒼陌而
流焰斷滅二十年閒水火無懼民到于今歌之召拜

戶部郎中不以望積南宮而怠弃其職修版圖以隱
覈郡國天下不敢以懇田籍民之數欺于有司除萬
年令問民疾苦而不問過失憂民賦輸而口憂盜賊
惠孚誠達其令自行端冕而朝轂下清靜遷京兆少
尹是歲荆吳昏墊宸衷軫駭親臨軒分命十使馳傳
弔諭且令察視非清明簡重有生民之望者不在此
選公復奏罄實固言蠲賦息役之宜爲聚斂者所嫉
出爲絳州刺史因其歲歉導以地利鑿汾而灌注者
十有三渠環絳而開闢者三千餘頃曷鹵之地京坻
勃興課最屢聞璽書降勞遷晉慈隰等州都防禦觀

卷二十七
察處置等使晉州刺史兼御史中丞賜紫金魚袋自
絳及晉不三百里惠澤旁浸仁聲先路者久矣至是
疲瘵之心如幽蟄聞春雷而起柔荑望和風而坼其
感煦馴致之自然歟居晉郡六年順宗就加左散騎
常侍銀青光祿大夫寵循政也今上徵爲兵部侍郎
崇德□也方議毗倚寘于台司中外翕然日夕以冀
俄以豐陵復土之重輟公嚴護拜京兆尹兼御史大
夫充山陵橋道等使公哀敬盡瘁殆忘寢食凡七十
日遇暴疾薨于長安通化里之私第高年五十有五
皇帝悼惜與歎詔贈吏部尚書太常諡曰某公給鹵

簿鼓吹以某年某月日葬于京兆府某縣之某原前
夫人博陵崔氏祔焉禮也公所撰家祭儀三卷文集
一十五卷凡諸著述數萬言並行於代崔夫人京兆
尹御史大夫鄴國公昭之女柔德懿行儀形閨壺貴
壽莫偕先公而歿有子曰延亮前某官孝敬忠厚英
華逸發胸襟所得徃徃有絕雲霓之勢若不離師友
無倦追琢吾見韋氏之餘慶未可量也二女長適桂
管觀察支使太常寺協律郎隴西李允元次適荆南
營田判官江陵府戶曹參軍隴西李景儉有是子以
爲後有是婿以託孤公其無憂於地下矣後夫人某

郡某氏某官某之女繼室以德罔替前修帷堂晝哭
 之後女有歸男有立姻族愈睦門風益清詠鵲巢之
 詩者孰不歸美公終鮮兄弟有姊一人承順恩敬貴
 而彌篤為海內所稱於戲六歲而孝聞人子之難也
 五十以悌聞人弟之難也苟非天性充塞以身立教
 者其孰能踐百行之至難乎况文章經術禮樂刑政
 磊落光耀之如彼斯可以言士之全也前年冬延亮
 泣奉家傳造予衡門以金石之事見託會守遠郡歲
 月差池作吏迫眉文字殆廢卒不獲命誠無愧詞銘
 曰

以甘受和以白受采治自闔門聞于四海韋公之行
 於是乎在名教以來未之有改吁嗟乎韋公天生蒸
 民非禮弗存貴為天子非禮弗尊韋公之學實專其
 門秉之以心立之以言吁嗟乎韋公惠訓孜孜視民
 如傷子產之後莫如龔黃韋公之政允紹其良民之
 父母今也則亡吁嗟乎韋公奕奕相庭在朝之右人
 方矚皇帝亦虛受韋公之年曷不悠久德慶既鬱宜
 其有後足本呂嗟乎韋公衡州集

唐故

南團練觀察處置等使通議大夫使特

潭州刺史中丞易紫

唐故湖南團練觀察處置等使通議大夫使持

其有

式觀

今由

其子

秉之以心立之以言

非

是乎

以甘受味以白受采

自閨門聞于四海

以甘受和以白受采治自閨門聞于四海韋公之行

於是乎在名教以來未之有改吁嗟乎韋公天生蒸

民非禮弗存貴為天子非禮弗尊韋公之學實專其

門秉之以心立之以言吁嗟乎韋公惠訓孜孜視民

如傷子產之後莫如龔黃韋公之政允紹其良民之

父母今也則亡吁嗟乎韋公奕奕相庭在朝之右人

方矚望帝亦虛受韋公之年曷不悠久德慶既鬱宜

足本呂 衡州集

唐故湖南團練觀察處置等使通議大夫使持

節都督潭州諸軍事守潭州刺史中丞賜紫

金魚袋贈陝州大都督東平呂府君夫人河
東郡君柳氏墓誌銘 并序

柳氏系起黃帝世家河東晉永嘉末濟南太守卓隨
軍南遷吾先太夫人其後也高祖善才皇朝荆王侍
讀曾祖尙素潤州江寧縣令大父慶休渤海縣丞以
第二子兵部侍郎渾平章政事追贈蔡州刺史工部
尙書考識屯田郎中集賢殿學士或戶牖儒奧或繩
墨吏道或龜龍文章率有純行皆有餘力渤海府君
以道之不行儲慶於相國屯田府君以賢而無後寓
美於夫人夫人年十四歸我先公從秩封安邑縣君

進爲河東郡君貞元十六年六月庚寅前先公七日
棄養于潭州官舍高年四十有二有男四人長曰恭
舉進士未第幼曰讓年小未學恭之中弟字翼天於
襁褓長女適淮南節度掌書記試太常寺奉禮郎豆
盧策次女適前進士柳滔二幼曰貢娘小貢僅卅髮
所母先公之子三人女一人長曰温前集賢殿校書
郎次日儉前僕寺進馬季字秦生能言而天女適故
太常寺協律郎杜正孤子温恭以某年十二月八日
號奉帷裳從先公歸奉祔于洛陽邙山清風原之大
塋禮也嗚呼痛哉夫人事先公二十七年事不思不

行言不踐不發循守法度輝光輔佐苟有虧先公而獲已所安未之或從苟有宜先公而於己未適無所不就先公或未叶于中必廢食感悟得請乃復先公之允歸于美則譽美將順以成爲繼王母在堂峻婦姑之禮夫人柔色肅氣奉威承顏虔盟潔饋之勤寒燠匪懈和灰紉緘之事願指而具備修婦順動以誠格旁感母道益無間言王氏姑尚禮而毅嘗言吾嬈敬我使我加重杜氏姑好仁而廉嘗言吾嬈知我使我加感劉氏姑與先公異出嘗言吾嬈信我使我加親其餘則循分制義親疎各得其所初克終中外

咸歸於穆夫人以恭既有譽處每戒曰文學政事汝有父師非吾所急吾唯厚爾孝悌之望豆盧氏柳氏女亦既有行每戒曰組紉環珮汝有姆傅非吾所勤吾唯宜爾室家之望恭由是先行後藝二妹皆自他有聞鍾愛於某常稱其克荷勸先公命以爲嗣而使恭下之惟疾之憂則恭無加也賢杜氏姊憐其早孀勸先公取以歸宗而躬撫之衣服禮秩則二妹莫倫也推是以往而配德肥家之道備矣外祖母喪夫人侍王母在洛訃自江左不勺飲者三日禮不敢過而哀有餘外祖前亦寓殯於丹陽外叔祖至宰相而未

克歸葬至是夫人訴於先公而假力焉且刺指書血
寄誓家老俾偕啟兼護歸伊川舊塋卜祥無收子之
名報德於移天之後言孝者以爲難夫人出自崔韋
氏長姨出自蕭先公貴爲方伯韋府君黃綬早世夫
人於異同之間榮悴之際愛敬必盡顏色無違言友
者以爲難從祖舅山南節度推官曰從學於外祖能
業文行夫人以終鮮兄弟憐比同氣見其立也喜亦
如之崔氏舅益王府參軍曰涇幼依外祖母矢志耶
園夫人以如存之思奉比諸父聞其喪也哀亦如之
推是以往而反本睦親之禮盡矣皆可以仁蹈中庸

義合古訓慈感土木孝通神明宜乎從先公極貴見
諸子垂白而始食郡封未開國號某未達恭未官幼
弟甫卅季妹方孩曾不浹辰怙恃繼失投血相視裂
肝窮號舉世獨冤終天莫訴嗚呼酷哉孤子某永負
極思靡所寘痛稽銘懿實不敢失墜其詞曰

景雲發祥古天子聖人之清柳爲氏氛氲萎蕤積繁
祉南遷鼎玉爛江沚吾先夫人懿厥後感神慈孝因
心友輔佐盛德譽無咎福宜高明壽悠久湖之南湘
之陰天平匪忱摧棘心洛有瀕邛有巔邈萬斯年咽

寒泉
上同

白居易

全唐文六百五十六有傳

授劉總秘書郎制

按此文見白氏文集四十八卷文苑英華四百卷與全唐文所收杜牧作同姑存其目

段平仲

平仲字秉庸武威人第進士元和申尚書右丞世推其敢直終太子左庶子

釐革太常儀注奏

按開元禮應受冊官初上儀並合與卑官答拜又准

令文僕射班品在三公之次三公上儀而嘗與卑僚

答拜僕射上獨受侍郎中丞等拜考之國典素無明

文因循乖越切在釐革太常所定儀制依據三公上

儀其間或有增損事體深為折衷酌為永制可以施

行應同所見各得連署

唐會要五十七

牛僧孺

全唐文六百八十二有傳

升御史大夫為三品奏

奉十一月二十八日勅中書門下奏御史大夫秦為上卿漢為副相又漢末復為大司空與丞相俱為三

公掌邦國刑憲肅政朝廷其任至重品秩殊峻望準
六尚書例升爲正三品御史中丞爲大夫之貳緣大
夫秩崇官不常置中丞爲憲臺之長今九寺少卿以
及秘書少監國子監司業京兆尹并府寺省監之貳
皆爲四品唯御史中丞官業雖重品秩未崇升爲正
四品下爲大夫之貳令不隔品亦與丞郎出入秩同
以重其任緣關朝廷典制須行之可久必得博盡羣
議詢謀僉同望令兩省御史臺五品已上尚書省四
品以上太子太保太常卿參議聞奏者伏以前代帝
王建官設位之制互有沿革升降廢置蓋取於一時

所宜苟得其宜則爲當代之美臣等伏據六典故事
御史大夫御史中丞等官歷代之制位不常定至於
刑憲之所倚則古今之任不殊今陛下方宏約法之
道俾增崇品秩同秩丞郎蓋千年一時之盛美也臣
等又據故事御史大夫總朝廷刑憲掌邦國紀綱峻
其秩位亦計所宜御史中丞雖官貳大夫與大夫多
不並置專席旣稱獨坐隔品豈合迭居今命秩資升
遷實爲允當臣等參詳事理眾議僉同伏請著於典
章永爲定制

唐會要
六十

唐故太常丞贈諫議大夫温府君神道碑

并敘

温氏裔顓頊爲己姓其後有平佐夏滅窮厥用祚土
子孫因口其邑而仍其侯侯廿六代至义口于周別
封于缺十字以纘以起曰序而忠曰恢而智美良崎義
口高口口下咽堙橫張鬱必大集缺廿八字無隱二祖之
德爆聞于時馨烈薰炙益熾而大口州生范陽令晉
冲范陽生右金吾缺廿六字佶字輔國口卽南鄭公之長
子也敏中方外韜蘊不露纂經窮元法爲時師元關
捍闔缺五字而歸缺十不閉魯郡公眞卿守平原公杖
策往謁雲風類隨忠氣合發當是時二顏橫起虜喉
咽受偏口口愁幾至缺十實繫公之助也乾元至德

間太尉臨淮王以智力自高少爲士屈待口口禮不
缺廿五字乞以爵縻因授太常丞公行藏有素訖謝而去
華奢聞顯益不憚愛捫神滅缺廿六字一人而已以建中
元年卒於鄴口之成安里第穆宗文宗朝累口子貴
贈諫議缺五字也子男口人曰邁曰遜曰造曰遜曰缺卅
五者氣實一缺五字世具於仲兄今尚書公誌墓文遜
於長慶大和間累以給缺五字不缺六字故徐州王僕射
飛章交薦朝廷口口起爲百里缺五字昔荀淑陳仲弓
父子兄弟以貞名高行爲時師每歲安車蒲輪玉帛
贄幣填塞門巷代光榮之今温門二世交聘微言不

絕於缺三字荀陳之缺三字其是歟天將稱其德而世其
家而今河陽三城節口使檢校戶部尚書公出焉尚
書名造卽諫議公之第三子潛武緯口口器缺十先
生之行具於故禮部郎中知制誥唐君次誌諫議公
墓文虎蹲蛟蟠卅始動三臺百口爭以狀乞累官至
尚書右丞屬興元缺九亂所殺朝廷憂之宰相泣於
上曰李絳死不口口而今而口口下爲鎮者孰敢主
其口了辯是役唯溫造耳上缺五授缺三度使公單
車去舉止如書生入之日自旦及午擁叛卒於外悉
殺之缺三字下梟其首亂者口口之祭李侯之柩於是

朝之大臣缺七若溫公者吾其可名乎微溫公吾其
能保其任而完其生乎當是時若事或不幸卽四方
之佼佼者傾耳而蜩起其可量哉識者以爲公之功
缺五而截天下之流不橫矣其後由台階而贊大化
福萬品而光祖先斯人之望可指而待嗟乎諫議之
烈不泯而尚書之德復口溫之缺四窮乎唐制位三
三品者父祖得以刻石紀神道僧孺於尚書爲缺三
日月爲多時門風祖烈聞口詳矣口其石口口讓於
仁銘曰
先生之先在世多才曰博宏將三英彥聯黎公瀛州

行口而羶華實難并系世復卑位不稱缺六厥有先生
先生口口危行缺四入神扶顏過安批裂兩河飢鯨駭
猥幾死塤窠兵血之間笑言委遲不有其庸孰利於
名名從而缺六思先生生必有子尙書之缺五晦當大明
功曝而貴嘻其先生亦已不死誰其刻詩楊郡長史

蘇景胤

景胤長慶中監察御史

重罰廟參不到奏

祠祭稱定出齋宮等舊例准廟參不到四品以上罰
二千文五品以上罰一千文伏緣所罰稍輕更請加

罰唐會要
二十三

劉栖楚

栖楚其出寒鄙爲鎮州小史王承宗奇之薦于李逢
吉逢吉喜助已不次任之歷右拾遺諫議大夫授刑
部侍郎數月改京兆尹峻誅罰恃權怙寵以干進韋
處厚惡之出爲桂管觀察使卒

閉市門禳諸陰奏

術者數之妙苟利於時必以救患伏以前度甚雨閉
門得晴臣請今後每陰雨五日卽令坊市閉北門以
禳諸陰晴三日便令盡開使啟閉有常永爲定式唐會

要八
十六

李德芳

德芳長慶中鄉貢明經

唐故顏府君墓誌銘 并序

府君諱永其先瑯琊人也祖考並繼世承訓餘風所播
□傳素葉門□清風志含大和隱而不仕□□君
中和立身□□全節溫柔成性積祿崇德□□言
謙□□嗚呼不幸遘疾卽以長慶四年歲次甲辰二
月辛巳朔□日丁亥終于揚州江陽縣□政里之私
第春秋六十有八夫人□南黃氏令則高門容華備

質笄年之歲歸于顏□□門事君子盡忠□親□慈

以□有男二人長曰亘次曰少洪皆缺九以其月廿

九日己酉安厝于蕪城之東嘉甯鄉五乍村之原謝

氏之地禮也缺八移故刻貞后紀德乃為銘曰

江漢炳靈繼生賢明猗歟顏君鬱然時英落日空奄

逝水崑傾卜葬平野風搖栢聲石刻

華良夫

良夫開成間人

讓試官書

聖唐有天下垂二百年登進士科者三千餘人良夫

之族未有登是科者以此慨歎憤惋從十歲讀書學
爲文章手寫之文過於千卷

唐撫言

麋簡

簡東海人開成中鄉貢進士

南陽萊公逆修墓誌銘

并序

唐越州上虞縣寶泉鄉處士萊再榮南陽人也其先
盛族以晉時過江卽□□睦郡烏龍山管壽昌縣仁
風鄉大厓二年從宦下車自晉扞越具載圖譜削繁
不書曾祖諱金祖諱銀皇考諱珪皆務本樂道林園
避時高尚不仕□□人榮陽鄭氏環公之女也公娶

童氏長五男四女長曰常倩次曰常春曰常又曰常
邁曰浩然長女適童氏次女歸樓氏次女趙氏次女
求氏公立性端直居家孝慈名行衆推郡邑景仰謹
身節用訓子業農智自心惠從目巧歲獲地利日資
天年造作改張成樹邸店輕財好施崇善敬空閭井
通和親朋恭順每與食以救飢餒解衣以濟單寒信
義在躬謙讓行已大易所貴知存亡得喪其唯聖人
乎大雅美其有初有終乃爲君子也遂得□□語妻
孥曰人生必有滅有來必有往吾欲逆修墓塋齋七
身後无擾尔意何如妻孥變色相顧叶順無違以開

成四年七月廿四日卜宅吉地得寶泉鄉孝敬
里新成村預造墳墓合祔並全先備夫妻同穴之義
運數將盡以□年□月□日歸葬此原生前有言誠
諸子曰常情等儉省隨時无妄破費慎勿奢僭益後
子孫莫惑交親宜守志行喪祭依禮无忤我情雲來
子孫永不可忘託麋秀才文字爲我銘云簡依命牽
拙其辭于後
知存亡兮其唯聖人知得喪兮固非凡身成家基兮
心因力因有初終兮易形爲神墳兮壟兮厚其塵松
兮栢兮無爲薪石兮字兮唯其真德兮馨兮千萬春

越中金
石記

李隨

隨長慶中秘書少監

請鑄造秘書閣圖書印疏

當省請置秘書閣圖書印一面伏以當省御書正本
開元天寶以前並有小印印縫自兵難以來書印失
墜今所寫經史都無記驗伏請鑄造

唐會要
六十五

李濬

濬憲穆間人按與全文八百十六李濬別

松窗雜錄序

澹憶兒童時卽歷聞公卿間叙國朝故事次兼多語
其口事特異者取其必實之跡暇日輟成一小軸題
曰松窗雜錄 本書

韋公式

公式官秘書郎京兆府功曹

嶽祠題記

右公式頃年佐理斯邑自後向逾一紀六變官曹今
者慮以官成身有所繫奔馬到此追尋舊遊覽前題
處豈勝□□ 金石萃編

方叅

叅大和中官左驍衛倉曹叅軍

嶽祠題記

□執籩豆爲國討叛思契丹懇敬祭敬拜牢餼畢陳
所期感通昭鑒不昧列旌旗于綠野羅冠劍于明庭
共展禮容因以題記 同上

大... 中... 訂... 本... 詳... 前... 會... 曾... 察... 置

